

ॐ नमः परमात्मने, श्री महागणपतये नमः, श्री गुरुभ्यो नमः  
हरिः ॐ

=====

3 कृष्ण यजुर्वेदीय तैत्तिरीय संहितायं तृतीय

## Contents

3.1 तृतीयकाण्डे प्रथमः प्रश्नः - न्यूनकर्माभिधानं	1
3.2 तृतीयकाण्डे द्वितीयः प्रश्नः - पवमानग्राहादीनां व्याख्यानं	16
3.3 तृतीयकाण्डे तृतीयः प्रश्नः - वैकृतविधीनामभिधानं	29
3.4 तृतीयकाण्डे चतुर्थः प्रश्नः - इष्टिहोमाभिधानं	41
3.5 तृतीयकाण्डे पञ्चमः प्रश्नः - इष्टिशेषाभिधानं	54

ॐ नमः परमात्मने, श्री महागणपतये नमः, श्री गुरुभ्यो नमः हरिः ॐ = = = = =

3 कृष्ण यजुर्वेदीय तैत्तिरीय संहितायं तृतीयं काण्डं

### 3.1 तृतीयकाण्डे प्रथमः प्रश्नः - न्यूनकर्माभिधानं

#### TS 3.1.1.1

प्रजापतिरकामयत् प्रजाः सृजेयेति स तपोऽतप्यत् स सर्पानंसृजत् सोऽकामयत् प्रजाः सृजेये-  
ति सद्वितीयमतप्यत् स वयांस्य सृजत् सोऽकामयत् प्रजाः सृजेयेति स तृतीयमतप्यत् स एतं  
दीक्षितवाद्-मपश्यत् तमवदत् ततो वै स प्रजा असृजत् यत् तपस्तत्त्वा दीक्षितवाद्-वदति प्रजा एव  
तद्यजमानः - [ ] 1

#### TS 3.1.1.2

सृजते यद्वै दीक्षितोऽमेद्धयं पश्यत्यपोऽस्मादीक्षाक्रामति नीलमस्य हरो व्येत्यबद्धं मनो दुरिद्रं चक्षुः  
सूर्यो ज्योतिषाऽश्रेष्ठो दीक्षे मा माहासीरित्याह नास्मादीक्षाऽपक्रामति नास्य नीलं न हरो व्येति यद्वै  
दीक्षितमभिवर्षतिदिव्या आपोऽशान्ता ओजो बलं दीक्षां - [ ] 2

**TS 3.1.1.3**

तपोऽस्यनिघ्नन्त्युन्दतीर् बलं धत्तौजो धत्त बलं धत्त मा मे दीक्षां मा तपोनिर्वधिष्टेत्याहै तदेव स-  
र्वमात्मन् धत्ते नास्यौजो बलं न दीक्षां न तपोनिघ्नन्त्यग्निर्वै दीक्षितस्य देवता सोऽस्मादेतरहितिर  
इव यरहि याति तमीश्वरः रक्षांसि हन्तौ - [ ] 3

**TS 3.1.1.4**

भद्रादभिधेयः प्रेहिबृहस्पतिः पुर एता ते अस्त्वित्याहब्रह्म वै देवानां बृहस्पतिस्तमेवान्वा रभते स  
एनः सं पारयत्ये दमगन्म देवयजनं पृथिव्या इत्याह देवयजनः ह्येष पृथिव्या आगच्छति यो यजते  
विश्वे देवा यदजुषन्त पूर्व इत्याह विश्वे ह्येतदेवा जोषयन्ते यद्वाह्मणा ( ) ऋक्सामाभ्यां यजुषा सन्त-  
रन्त इत्याहर्क्सामाभ्यां ह्येष यजुषा सन्तरति यो यजते रायस्पोषेण समिषा-मदेमेत्याह-हाशिषमेवै  
तामा शास्ते ॥ 4

(यजमानो - दीक्षाः - हन्तौ - ब्राह्मणा - श्वतुर्विंशतिश्च) (A1)

**TS 3.1.2.1**

एष ते गायत्रो भाग इति मे सोमाय ब्रूतादेष ते त्रैष्टुभो जागतो भाग इति मे सोमाय ब्रूताच्छ-  
न्दोमानाः साम्राज्यं गच्छेति मे सोमाय ब्रूताद् यो वै सोमः राजानः साम्राज्यं लोकं गमयित्वा  
क्रीणाति गच्छति स्वानाः साम्राज्यं छन्दांसि खलु वै सोमस्य राज्ञः साम्राज्यो लोकः पुरस्ताथ  
सोमस्य क्रयादेवमभि मन्त्रयेत् साम्राज्यमेवै - [ ] 5

**TS 3.1.2.2**

नं॑ लो॒कं ग॑मयित्वा क्री॑णाति गच्छ॑ति स्वानां॑ साम्रा॑ज्यं यो वै ता॑नून॒प्त्रस्य॑ प्रति॒ष्ठां वे॒दु प्रत्ये॒व ति॑ष्ठति ब्र॒ह्मवा॒दिनो॑ वदन्ति न प्रा॒श्नन्ति न जु॑ह्वत्यथ॒ क्व ता॑नून॒प्त्रं प्रति॑ तिष्ठतीति॒ प्रजा॑प॒तौ म॒न॒सीति॑ ब्रूयात् त्रि॒रव॑ जिघ्रेत् प्रजा॑प॒तौ त्वा॒ म॒न॒सि जु॒होमीत्येषा॑ वै ता॑नून॒प्त्रस्य॑ प्रति॒ष्ठा य ए॒वं वे॒दु प्रत्ये॒व ति॑ष्ठति यो - [ ] 6

**TS 3.1.2.3**

वा अ॒द्ध्योः प्रति॑ष्ठां वे॒दु प्रत्ये॒व ति॑ष्ठति यतो॒ मन्ये॒तान॑भिक्रम्य हो॒ष्यामी॑ति॒ तत् तिष्ठ॑न्ना श्रा॒वये॒देषा॑ वा अ॒द्ध्योः प्रति॑ष्ठा य ए॒वं वे॒दु प्रत्ये॒व ति॑ष्ठति यद॑भिक्रम्य जुहुयात् प्रति॑ष्ठाया॑ इयात् तस्मा॑त् स॒मान॒त्र ति॑ष्ठता होत॒व्यं प्रति॑ष्ठित्यै यो वा अ॒द्ध्योः स्वं वे॒दु स्ववा॑ने॒व भ॑वति सु॒गवा॑ अस्य॒ स्वं वा॑य॒व्यम॑स्य - [ ] 7

**TS 3.1.2.4**

स्वं च॑म॒सोऽस्य॒ स्वं य॒द्वाय॑व्यं॒ वा च॑म॒सं वा॑ऽन॒न्वार॑भ्याऽऽश्रा॒वये॒त् स्वादि॑यात् तस्मा॑ द॒न्वा॒भ्याऽऽश्रा॒व्यः स्वादे॒व नैति॑ यो वै सोम॒म- प्रति॑ष्ठाप्य स्तो॒त्र-मु॒पाक॑रोत्य॒ प्रति॑ष्ठितः सोमो॒ भव॑त्य॒ प्रति॑ष्ठि॒तः स्तोमो॒- ऽप्रति॑ष्ठिता॒न्युक्थान्य॑प्रति॑ष्ठितो॒ यज॑मानो॒ ऽप्रति॑ष्ठितो॒ ऽध्व॒र्युर्वा॑ य॒व्यं वै सोम॑स्य॒ प्रति॑ष्ठा च॑म॒सोऽस्य॒ प्रति॑ष्ठा सोमः॒ स्तोम॑स्य॒ स्तोमं॑ उ॒क्थानां॑ ग्र॒हं वा॑ ( ) गृही॒त्वा च॑म॒सं वो॒च्चीय॑ स्तो॒त्र-मु॒पा कु॑र्यात् प्रत्ये॒व सोमः॑ स्था॒पय॑ति॒ प्रति॑स्तोमं॒ प्रत्यु॒क्थानि॑ प्रति॒ यज॑मान॒स्तिष्ठ॑ति॒ प्रत्य॑द्ध्युः ॥ 8

(एव - तिष्ठति यो - वायव्यमस्य - ग्रहं वै - कान्न - विशतिश्च) (A2)

**TS 3.1.3.1**

य॒ज्ञं वा॑ ए॒तत् स॑ भ॑रन्ति यत् सोम॑क्रय॒ण्यै प॒दं य॑ज्ञ॒मुखः॑ ह॒विर्द्धाने॑ य॒र्हि ह॒विर्द्धाने॑ प्राचीं॑ प्र॒वर्तये॑युस्त॒र्हि ते॒नाक्ष॑मु॒पा-ञ्ज्याद्-य॑ज्ञ॒मुख ए॒व य॑ज्ञ॒मनु॑ सन्त॑नोति प्राञ्च॑म॒ग्निं प्र॑ ह॒रन्त्यु॑त् प॒त्नीमा॑

नयन्त्यन्वनाऽसि प्र वर्तयन्त्यथ वा अस्यैष धिष्णि॑यो हीयते सोऽनु॑ ध्यायति स ई॑श्वरो रु॒द्रो भू॒त्वा  
- [ ] 9

**TS 3.1.3.2**

प्र॒जां प॒शून् यज॑मानस्य शम॑यितो॒र्यर॑हि प॒शुमा प्री॑तमुद॑ञ्चं नय॑न्ति तर॑हि तस्य॑ पशु॒श्रप॑णः ह-  
रेत् तेनै॒वैनं॑ भा॒गिनं॑ करोति यज॑मानो वा आ॒हव॑नीयो यज॑मानं वा ए॒तद्वि क॑र॒षन्ते यदा॑हव॒नीया॑त्  
पशु॒श्रप॑णः ह॑रन्ति स वैव स्यान्नि॑र्मन्थ्यं वा कुर्या॑द् यज॑मानस्य सा॒त्मत्वा॑य यदि॑ प॒शोर॑व॒दानं न-  
श्ये॒दाज्य॑स्य प्र॒त्याख्या॑यमव॑द्येथ सैव ततः ( ) प्रायश्चित्ति॑र्ये प॒शुं वि॑म॒श्रीर॑न् यस्तान् का॒मये॑ता  
ऽऽ\*ति॑मा॒च्छेयु॑रिति॑ कु॒विदु॑ङ्गेति॑ नमो॑ वृ॒क्तिव॑त्यर्चाऽऽग्री॑द्धे जुहु॒यान्न॑मो वृ॒क्तिमे॒वैषां॑ वृ॒द्धे ता॒जगा॑र्तिमा-  
च्छ॑न्ति ॥ 10

(भूत्वा - ततः - षड्विंशतिश्च) (A3)

**TS 3.1.4.1**

प्र॒जाप॑तेर्जाय॑मानाः प्र॒जा जा॒ताश्च॑ या इ॒माः । तस्मै॑ प्रति॑ प्र वे॑दयचि॒कित्वा॑ऽ अनु॑ मन्यतां ॥ इ॒मं  
प॒शुं प॑शुपते ते अ॒द्य ब॒द्धाम्य॑ग्रे सु॒कृत॑स्य म॒द्भ्ये । अनु॑ मन्यस्व सु॒यजा॑ यजाम॒ जुष्टं॑ दे॒वाना॑मि॒दम॑स्तु  
ह॒व्यं ॥ प्र॒जान॑न्तः प्रति॑गृह्णन्ति॒ पूर्वे॑ प्रा॒णम॑ङ्गेभ्यः पर्या॑चरन्तं । सु॒वर्गं॑ या॒हि प॒थिभि॑ दे॒व्याना॑-रोष॑धीषु  
प्रति॑तिष्ठा शरी॑रैः ॥ येषा॑मी॒शे - [ ] 11

**TS 3.1.4.2**

पशु॒पतिः॑ प॒शूनां॑ चतु॑ष्पदामु॒त च॑ द्वि॒पदा॑ । निष्क्री॑तोऽयं य॒ज्ञियं॑ भा॒गमे॑तु रा॒यस्पोषा॑ यज॑मानस्य  
सन्तु ॥ ये ब॒द्धय॑मानमनु॑ ब॒द्धय॑माना अ॒भ्यैक्ष॑न्त मन॑सा चक्षु॑षा च । अ॒ग्निस्ता॑ऽ अ॒ग्रे प्रमु॑मोक्तु  
दे॒वः प्र॒जाप॑तिः प्र॒जया॑ सँवि॒दानः ॥ य आ॑र॒ण्याः प॒शवो॑ वि॒श्वरू॑पा वि॒रूपाः॑ सन्तो॑ बहु॒धैक॑रूपाः  
। वा॒युस्ता॑ऽ अ॒ग्रे प्रमु॑मोक्तु दे॒वः प्र॒जाप॑तिः प्र॒जया॑ सँवि॒दानः ॥ प्रमु॑ञ्चमा॒ना - [ ] 12

**TS 3.1.4.3**

भुव॑नस्य॒ रेतो॑ गा॒तुं ध॑त्त॒ यज॑मानाय देवाः । उ॒पाकृ॑तः शश॑मानं॒ यद॑स्था॒ज्जी॒वं दे॒वाना॑म॒प्येतु॑ पाथः  
 ॥ नाना॑ प्रा॒णो यज॑मानस्य प॒शुना॑ य॒ज्ञो दे॒वेभिः॑ सह दे॒व्यानाः॑ । जी॒वं दे॒वाना॑म॒प्येतु॑ पाथः स॒त्याः  
 सं॒न्तु यज॑मानस्य॒ कामाः॑ ॥ यत् प॒शुर्मा॑युमकृ॒तोरो॑ वा प॒द्भिरो॑हते । अ॒ग्निर्मा॑ तस्मा॒देन॑सो वि॒श्वान्  
 मुञ्च॑त्वः॒हंसः॑ ॥ शमि॑तार उ॒पेत॑न य॒ज्ञं - [ ] 13

**TS 3.1.4.4**

दे॒वेभि॑रि॒न्वितं॑ । पाशा॑त् प॒शुं प्र॑मुञ्चत ब॒न्धाद्य॑ऽप॒तिं परि॑ ॥ अदि॑तिः पाशं प्र॑मु॒मोक्त॒वेतं॑ नमः प॒शुभ्यः॑  
 प॒शुप॑तये करोमि ॥ अ॒रा॒ती॒यन्त॒-म॒धरं॑ कृ॒णोमि॒ यं द्वि॑ष्मस्तस्मिन् प्रति॑ मुञ्चामि पाशं ॥ त्वामु  
 ते दधि॑रे ह॒व्यवा॑हः शृ॒तं कृ॑र्तारमु॒त य॒ज्ञियं॑ च । अ॒ग्रे स॑दक्षः स॒त॒नुर॒हि भू॒त्वाऽथ॑ ह॒व्या जा॑तवेदो  
 जुष॑स्व ॥ जा॒तवे॑दो व॒पया॑ गच्छ दे॒वान्त्वः॑ ( ) हि होता॑ प्रथ॒मो ब॒भूथ॑ । घृ॒तेन॒ त्वं त॒नुवो॑ व॒र्द्धय॑स्व  
 स्वाहा॑कृतः ह॒विर॑दन्तु दे॒वाः ॥ स्वाहा॑ दे॒वेभ्यो॑ दे॒वेभ्यः॑ स्वाहा॑ ॥ 14

(ईशै - प्रमुञ्चमाना - य॒ज्ञं - त्वः - षोड॑श च) (A4)

**TS 3.1.5.1**

प्रा॒जाप॑त्या वै प॒शव॑स्तेषां रु॒द्रोऽधि॑पतिर्य॒-दे॒ताभ्या॑-मु॒पा क॑रोति ताभ्या॑मे॒वैनं॑ प्रति॒प्रोच्याऽऽल॑भत आ॒-  
 त्मनो॑ऽना॒व्रस्काय॑ द्वाभ्या॑मु॒पाक॑रोति द्वि॒पाद्यज॑मानः प्रति॑ष्ठित्या उ॒पाकृ॑त्य पञ्च जु॒होति॑ पा॒ङ्क्ताः प॒शवः॑  
 प॒शून्वे॒वा व॑रु॒न्धेमृ॑त्यवे वा ए॒ष नी॑यते यत् प॒शुस्तं॑ यद॒न्वार॑भेत प्र॒मायु॑को यज॑मानः स्या॒न्नाना॑ प्रा॒णो  
 यज॑मानस्य प॒शुने॒त्याह॑ व्यावृ॑त्त्यै - [ ] 15

**TS 3.1.5.2**

यत् प॒शुर्मा॑युमकृ॒तेति॑ जु॒होति॑ शान्त्यै शमि॑तार उ॒पेत॑नेत्या॒ह यथा॑य॒जुरे॒वैतद्व॑पायां वा आ॒ह्रिय॑माणाया-

म॒ग्नेर्मे॑धोऽप॑ क्राम॒ति॒ त्वामु॑ ते द॑धिरे ह॒व्य॒वाह॑मिति॒ व॒पाम॒भि जु॑होत्य॒ग्नेरे॒व मे॑ध॒मव॑ रु॒न्धेऽथो॑ श्रु॒त॒त्वाय॑  
पु॒रस्ता॑त्स्व॒हा कृ॑तयो॒ वा अ॒न्ये दे॒वा उ॒परि॑ष्टात्स्व॒हाकृ॑तयोऽन्ये॒ स्वाहा॑ दे॒वेभ्यो॑ दे॒वेभ्यः॑ स्वाहे॒  
त्य॒भितो॑ व॒पां ( ) जु॑होति॒ ताने॒वोभ॑यान् प्रीणाति ॥ 16

(व्यावृत्त्या - अभितो वपां - पञ्च च) (A5)

### TS 3.1.6.1

यो वा अ॒य॒थादे॑वतं य॒ज्ञमु॑प॒चर॑त्या दे॒वता॑भ्यो वृ॒श्च्यते॑ पापी॒यान् भ॑वति॒ यो य॒थादे॑वत॒न्न दे॒वता॑भ्य  
आ वृ॒श्च्यते॑ वसी॒यान् भ॑वत्या॒ग्नेय्य॑र्चा ऽऽग्नी॒द्धम॒भि मृ॑शेद् वैष्ण॒व्या ह॑वि॒र्द्धान॑मा॒ग्नेय्या॑ सु॒चो वा॒युव्य॑या  
वा॒युव्या॑न्यैन्द्रि॒या स॒दो य॒थादे॑वतमे॒व य॒ज्ञमु॑प॒ चर॑ति न दे॒वता॑भ्य आ वृ॒श्च्यते॑ वसी॒यान् भ॑वति॒ युन॑ज्मि  
ते पृ॒थि॒वीं ज्योति॑षा स॒ह युन॑ज्मि वा॒युम॑न्तरि॒क्षेण॑ - [ ] 17

### TS 3.1.6.2

ते स॒ह युन॑ज्मि वाचः॑ स॒ह सूर्ये॑ण ते युन॑ज्मि ति॒स्रो वि॒पृचः॑ सूर्य॑स्य ते । अ॒ग्निदे॑वता॒ गाय॑त्री  
छन्द॑ उपा॒शोः पात्र॑मसि॒ सोमो॑ दे॒वता॑ त्रि॒ष्टुप् छन्दो॑ऽन्तर्या॒मस्य॑ पात्र॑मसीन्द्रो॒ दे॒वता॑ जग॑ती छन्द॑  
इन्द्र॑वा॒युवोः पात्र॑मसि॒ बृह॑स्पति॒र् दे॒वता॑ऽनु॒ष्टुप् छन्दो॑ मि॒त्रावरु॑णयोः पात्र॑मस्य॒श्विनो॑ दे॒वता॑ प॒ङ्क्ति॑श्छ॒  
न्दोऽश्वि॑नोः पात्र॑मसि॒ सूर्यो॑ दे॒वता॑ बृ॒हती॑ - [ ] 18

### TS 3.1.6.3

छन्दः॑ शु॒क्रस्य॑ पात्र॑मसि॒ चन्द्र॑मा॒ दे॒वता॑ स॒तो बृ॑हती॒ छन्दो॑ म॒न्थिनः॑ पात्र॑मसि॒ विश्वे॑दे॒वा दे॒वतो॑ष्णिहा॒  
छन्द॑ आ॒ग्र॒य॒णस्य॑ पात्र॑मसीन्द्रो॒ दे॒वता॑ क॒कुच्छ॑न्द॒ उक्थ॑ानां पात्र॑मसि॒ पृथि॒वी दे॒वता॑ वि॒राट् छन्दो॑  
ध्रु॒वस्य॑ पात्र॑मसि ॥ 19

(अन्तरिक्षेण - बृहती - त्रयस्त्रिंशच्च) (A6)

**TS 3.1.7.1**

इष्टर्गो वा अङ्घ्र्युर्यजमानस्येष्टर्गः खलु वै पूर्वोऽर्घुः क्षीयत आसन्न्यान्मा मन्त्रात् पाहि कस्याश्चि-  
दभिशास्त्या इति पुरा प्रातरनुवाकाज्जुहुयादात्मन एव तदङ्घ्र्युः पुरस्ताच्छर्म नह्यतेऽनीत्यै संवेशाय  
त्वोपवेशाय त्वा गायत्रिया स्त्रिष्टुभो जगत्या अभिभूत्यै स्वाहा प्राणापानौ मृत्योर्मा पातं प्राणापानौ  
मा मा हासिष्टं देवतासु वा एते प्राणापानयोर् - [ ] 20

**TS 3.1.7.2**

व्यायच्छन्ते येषां सोमः समृच्छते संवेशाय त्वोपवेशाय त्वेत्याह छन्दांसि वै संवेश उपवेशश्च-  
न्दाभिरेवास्य छन्दांसि वृद्धे प्रेतिवन्त्याज्यानि भवन्त्यभिजित्यै मरुत्वन्तीः प्रतिपदो विजित्या उभे  
बृहद्रथन्तरे भवत इयं वाव रथन्तरमसौ बृहदाभ्यामेवैनमन्तरेत्यद्य वाव रथन्तरं श्वो बृहदद्याश्वा  
देवैनमन्तरेति भूतं - [ ] 21

**TS 3.1.7.3**

वाव रथन्तरं भविष्यद्-बृहद् भूताच्चैवैनं भविष्यतश्चान्तरेति, परिमितं वाव रथन्तरमपरिमितं बृहत्  
परिमिताच्चैवैनमपरिमिताच्चाऽन्तरेति विश्वामित्रजमदुग्नी वसिष्ठेनास्पद्धेतांस एतज्जमदग्निं विहव्यम  
पश्यत् तेन वै स वसिष्ठस्येन्द्रियं वीर्यमवृद्धं यद्विहव्यं शस्यत इन्द्रियमेव तद्वीर्यं यजमानो भ्रातृ-  
व्यस्य वृद्धे ( ) यस्य भूयांसो यश्क्रतव इत्याहुः स देवता वृद्ध इति यद्यग्निष्टोमः सोमः पुरस्ताथ  
स्या-दुक्थ्यं कुर्वीत यद्युक्थ्यः स्यादतिरात्रं कुर्वीत यश्क्रतुभिरेवास्य देवता वृद्धे वसीयान् भवति ॥

22

(प्राणापानयो - भूतं - वृद्धे - ऽष्टाविंशतिश्च) (A7)

**TS 3.1.8.1**



नि॒ग्राभ्याः॑ स्थ दे॒व॒श्रु॒त॒ आ॒यु॒र्मे॑ तर्पयत प्रा॒णं मे॑ तर्पयतापा॒नं मे॑ तर्पयत व्या॒नं मे॑ तर्पयत॒ चक्षु॑र्मे॒ तर्पय॑त॒ श्रो॒त्रं मे॑ तर्पयत॒ मनो॑मे॒ तर्पय॑त॒ वाचं॑ मे॒ तर्पय॑ताऽऽ॒त्मानं॑ मे॒ तर्पय॑ताङ्गा॒नि मे॑ तर्पयत प्र॒जां मे॑ तर्पयत प॒शून् मे॑ तर्पयत गृ॒हान् मे॑ तर्पयत ग॒णान् मे॑ तर्पयत स॒र्व॒गणं॑ मा तर्पयत त॒र्पय॑त मा - [ ] 23

**TS 3.1.8.2**

ग॒णा मे॒ मा वि॑ तृ॒ष॒न्नोष॑धयो॒ वै सोम॑स्य॒ विशो॑ विशः॒ खलु॑ वै रा॒ज्ञः प्र॑दा॒तोरी॑श्वरा ऐ॒न्द्रः सोमो॑ऽवी॒वृधं॑  
वो॒ मन॑सा सुजा॒ता ऋ॑त॒प्रजा॑ता॒ भग॒ इद्वः॑ स्याम । इ॒न्द्रेण॑ दे॒वीर्वी॑रुधः सँवि॒दा॒ना अनु॑ मन्यन्ताः  
सर्व॑नाय॒ सोम॑मित्या॒हौष॑धीभ्य ए॒वैनः॑ स्वायै॒ विशः॑ स्वायै॒ देव॑तायै॒ निर्या॑च्याभि॒ षुणो॑ति॒ यो वै सो॒म॑स्याभि॒षूय॑माणस्य - [ ] 24

**TS 3.1.8.3**

प्रथ॑मोऽ॒शुः स्क॑न्दति॒ स ई॑श्वर इ॒न्द्रियं॑ वी॒र्यं॑ प्र॒जां प॒शून् यज॑मानस्य॒ निर॑ह॒न्तोस्त॑म॒भि म॑न्त्रये॒ताऽऽ  
मा॑ऽस्का॒न्त्स॒ह प्र॑जाया॒ सह॑ रा॒यस्पोषे॑णेन्द्रियं मे॒ वी॒र्यं॑ मा नि॒वर्द्धी॑रित्या॒शिष॑मे॒वैता॑मा शा॒स्त इन्द्रि॑यस्य॒ वी॒र्यं॑स्य प्र॒जायै॑ प॒शूना॑मनि॒र्घा॒ताय॑ द्र॒प्सश्च॑स्कन्द॒ पृथि॑वीमनु॒ द्यामि॑मञ्च॒ योनि॑मनु॒ यश्च॑ ( ) पूर्वं॑ ।  
तृती॑यं॒ योनि॑मनु॒ सञ्चर॑न्तं द्र॒प्सं जु॑हो॒म्यनु॑ स॒प्त हो॒त्राः॑ ॥ 25

(त॒र्पय॑त मा - ऽभि॒षूय॑माणस्य - यश्च॑ - दश॑ च) (A8)

**TS 3.1.9.1**

यो वै दे॒वान् दे॒वय॑श॒सेना॑र्पयति॒ मनु॑ष्या॒न् मनु॑ष्ययश॒सेनं॑ दे॒वय॑श॒स्येव॑ दे॒वेषु॑ भवति॒ मनु॑ष्ययश॒सी  
म॑नु॒ष्येषु॑ या॒न् प्रा॒चीन॑-माग्र॒यणा॑द् ग्र॒हान् गृ॒हीया॑त् ता॒नुपा॑ऽशु॒ गृ॒हीया॑द्या॒नूर्द्धा॑ऽस्तानु॒प॒ब्दिम॑तो॒ देवाने॑व  
तदे॒वय॑श॒सेना॑र्पयति॒ मनु॑ष्या॒न् मनु॑ष्ययश॒सेनं॑ दे॒वय॑श॒स्येव॑ दे॒वेषु॑ भवति॒ मनु॑ष्ययश॒सी म॑नु॒ष्येष्व॑ग्निः  
प्रा॒तस्स॑व॒ने पा॑त्व॒स्मान् वै॑श्वान॒रो म॑हि॒ना वि॒श्वश॑म्भूः । स नः॑ पा॒व॒को द्र॑वि॒णं द॑धा॒त्वा - [ ] 26

**TS 3.1.9.2**

युष्मन्तः स॒हभ॑क्षाः स्याम ॥ विश्वे॑ दे॒वा म॒रुत॑ इन्द्रो॑ अ॒स्मान॒स्मिन् द्वि॑तीये॒ सव॑ने॒ न ज॑ह्युः ।  
 आयु॑ष्मन्तः प्रि॒यमेषां॑ व॒दन्तो॑ व॒यं दे॒वाना॑ सु॒म॒तौ स्या॑म ॥ इ॒दं तृ॑तीयः॒ सव॑नं कवी॒नामृ॑तेन॒ ये  
 च॑म॒समैर॑यन्त । ते सौ॑धन्व॒नाः सु॑व॒रान॑शा॒नाः स्वि॑ष्टिं नो अ॒भि व॑सी॒यो न॑यन्तु ॥ आ॒यत॑नवती॒र्वा  
 अ॒न्या आहु॑तयो हू॒यन्ते॑ऽनाय॒त॒ना अ॒न्या या आ॑घा॒रव॑ती॒स्ता आ॒यत॑नवती॒र्याः - [ ] 27

**TS 3.1.9.3**

सौ॒म्यास्ता अ॑नाय॒त॒ना ऐ॑न्द्रवा॒यव॒-मा॒दाया॑ऽऽ\*घा॒रमा॑ घा॒रये॑द॒द्धरो॑ य॒ज्ञोऽय॑म॒स्तु दे॒वा ओष॑धी॒भ्यः  
 प॒शवे॑ नो॒ जना॑य॒ विश्व॑स्मै भू॒ताया॑ऽऽद्ध॒रोऽसि॑ स पि॒न्वस्व॑ घृ॒तव॑दे॒व सो॒मेति॑ सौ॒म्या ए॒व तदा॑हु॒तीरा॒यत॑-  
 नव॑तीः करो॒त्याय॑त॒नवान् भ॑वति॒ य ए॒वं वे॒दाथो॑ द्यावा॑पृथि॒वी ए॒व घृ॑तेन॒ व्यु॑न॒त्ति ते व्यु॑त्ते॒ उप॑जीव॒नीये॑  
 भ॑वत॒ उप॑जीव॒नीयो॑ भ॑वति - [ ] 28

**TS 3.1.9.4**

य ए॒वं वे॒देष॑ ते रु॒द्रभा॑गो यं नि॒रया॑च॒थास्तं॑ जुष॒स्व वि॒देगौ॑प॒त्यः रा॒यस्पोष॑ सु॒वीर्य॑ स॒वथ्स॑रीणाः  
 स्व॒स्ति ॥ मनुः॑ पु॒त्रेभ्यो॑ दा॒यं व्य॑भज॒थ स ना॑भा॒नेदि॑ष्ठं ब्रह्म॒चर्यं॑ व॒सन्तं॑ नि॒रभ॑ज॒थ स आ॑ऽगच्छ॒थ  
 सौ॑ऽब्रवीत् क॒था मा॒ निर॑भा॒गिति॑ न त्वा॒ निर॑भाक्ष॒मित्य॑-ब्रवी॒दङ्गिर॑स इ॒मे स॒त्रमा॑स॒ते ते - [ ] 29

**TS 3.1.9.5**

सु॒वर्गं॑ लो॒कं न॑ प्र॒जान॑न्ति॒ तेभ्य॑ इ॒दं ब्रा॒ह्मणं॑ ब्रूहि॒ ते सु॒वर्गं॑ लो॒कं य॑न्तो॒ य ए॑षां प॒शव॑स्ता॒स्ते  
 दा॑स्य॒न्तीति॑ तदे॒भ्योऽब्र॑वीत् ते सु॒वर्गं॑ लो॒कं य॑न्तो॒ य ए॑षां प॒शव॑ आ॒सन् तान॑स्मा॒ अद॑दुस्तं प॒शुभि॑-  
 श्वर॑न्तं॒ यज्ञ॑वा॒स्तौ रु॒द्र आ॑ऽगच्छ॒थ सौ॑ऽब्रवी॒न्मम॑ वा इ॒मे प॒शव॑ इत्य॒दुर्वै - [ ] 30

**TS 3.1.9.6**

मह्य॑मि॒मानि॑त्य॒ब्रवी॑न्न वै तस्य॒ त ई॑श॒त इत्य॑ब्रवी॒द्यद्-य॑ज्ञ॒वास्तौ॑ ही॒यन्ते॑ मम॒ वै तदि॑ति॒ तस्मा॑द्-

यज्ञ्वास्तु नाभ्यवेत्य॑ सौ॒ऽब्रवीद्-य॒ज्ञो मा ऽऽभ॒जाथ॑ ते प॒शून् नाभि॑ म॒स्य इति॑ तस्मा॑ ए॒तं म॒न्थिनः॑  
स॒ स्राव॑म॒जुहो॑त् ततो॒ वै तस्य॑ रु॒द्रः प॒शून् नाभ्य॑मन्यत॒ यत्रैत॑ ( ) मे॒वं वि॒द्वान् म॒न्थिनः॑ स॒ स्राव॑  
जुहो॑ति न तत्र॑ रु॒द्रः प॒शून्भि॑ मन्यते ॥ 31

(दुधा॒त्वा - यत॑नवती॒र्या - उ॑पजीव॒नीयो॑ भवति - तेऽ - दुर्वै - यत्रै॒त - मेका॑दश च) (A9)

### TS 3.1.10.1

जुष्टो॑ वा॒चो भू॒यासं॑ जुष्टो॑ वा॒चस्प॑तये देवि॑ वाक् । यद्वा॒चो मधु॑मत् तस्मि॑न् मा धाः॒ स्वाहा॑ सर॑स्वत्यै  
॥ ऋ॒चा स्तोम॑ स॒मर्द्ध॑य गाय॒त्रेण॑ रथ॑तरं । बृ॒हद्-गा॑य॒त्रव॑र्तनि ॥ यस्ते॑ द्र॒प्सः स्क॑न्दति॒ यस्ते॑  
अ॒शुर्बा॑हुच्यु॒तो धि॑षण॒योरु॑पस्था॒त् । अ॒द्भ्योर्वा॑ परि॒ यस्ते॑ प॒वित्रा॑थ॒ स्वाहा॑कृत॒मिन्द्रा॑य॒ तं जु॑होमि  
॥ यो द्र॒प्सो अ॒शुः प॑तितः पृ॒थिव्यां॑ प॒रिवा॑पात् - [ ] 32

### TS 3.1.10.2

पु॒रोडा॑शा॒त् क॒र॒म्भात् । धा॒ना॒सो॒मा॒न्म॒न्थिन॑ इन्द्र॒ शु॒क्राथ॑ स्वाहा॑कृत॒मिन्द्रा॑य॒ तं जु॑होमि ॥ यस्ते॑  
द्र॒प्सो मधु॑मा॒ इन्द्रि॑यावा॒न्थ॒ स्वाहा॑कृतः पु॒नर॑प्येति॒ देवा॑न् । दि॒वः पृ॒थिव्याः॑ पर्य॒न्तरि॑क्षा॒थ॒ स्वाहा॑  
कृत॒मिन्द्रा॑य॒ तं जु॑होमि ॥ अ॒द्भ्योर्वा॑ ऋ॒त्विजां॑ प्रथ॒मो यु॑ज्यते तेन॒ स्तोमो॑ योक्त॒व्यं इत्या॑हुर्वा॒गग्रे॑गा  
अग्रं॑ ए॒त्वृजु॑गा दे॒वेभ्यो॑ यशो॒ मयि॑ दध॑ती प्रा॒णान् प॒शुषु॑ प्र॒जां मयि॑- [ ] 33

### TS 3.1.10.3

च॒ यज॑माने॒ चेत्या॑ह॒ वाच॑मे॒व तद्य॑श्मुखे यु॒नक्ति॑ वास्तु॒ वा ए॒तद्य॑स्स्यं क्रियते॒ यद्वा॒हान् गृही॑त्वा  
ब॑हिष्पवमा॒नः सर्प॑न्ति॒परा॑ञ्चो हि यन्ति॒ परा॑चीभिः स्तु॒वते॑ वैष्ण॒व्यर्चा॑ पु॒नरे॒त्योप॑ तिष्ठते॒ यज्ञो॑ वै  
विष्णुं॑ य॒ज्ञमे॒वाक्वि॑ष्णो॒ त्वन्नो॑ अ॒न्तमः॑ शर्म॒ यच्छ॑ सह॒न्त्य । प्र॒ ते धा॑रा॒ मधु॑श्चु॒त उ॒त्सं दु॑हते ( )  
अक्षि॑त॒मित्या॑ह॒ यदे॒वास्य॑ शया॒नस्यो॑प॒शुष्य॑ति॒ तदे॒वास्यै॑तेना ऽऽ\*प्या॑ययति ॥ 34

(परिवापात् - प्रजां मयि - दुहते - चतुर्दश च) (A10)

### TS 3.1.11.1

अग्निना रयिमंश्नवत् पोषमेव दिवेदिवे । यशसं वीरवत्तमं ॥ गोमां अग्नेऽविमां अश्वी यज्ञो  
नृवत्सखा सदमिदं प्रमृष्यः । इडावां एषो असुर प्रजावान् दीर्घो रयिः पृथुबुधः सभावान् ॥ आ-  
प्यायस्व > 1, सन्ते > 2 ॥ इह त्वष्टारमग्रियं विश्वरूपमुप ह्वये । अस्माकमस्तु केवलः ॥  
तन्नस्तुरीपमधं पोषयित्नु देवं त्वष्टर्वि रराणः स्यस्व । यतो वीरः - [ ] 35

### TS 3.1.11.2

कर्मण्यः सुदक्षो युक्तग्रावा जायते देवकामः ॥ शिवस्त्वष्टरिहाऽऽ गंहि विभुः पोष उतत्मना ।  
यज्ञेयं न उदेव ॥ पिशङ्गरूपः सुभरो वयोधाः श्रुष्टी वीरो जायते देवकामः । प्रजां त्वष्टा  
विष्यतु नाभिं मस्मे अथा देवानामप्येतु पार्थः ॥ प्रणोदे > 3 व्या, नो दिवः > 4 ॥ पीपिवां स  
सरस्वतः स्तनं यो विश्वदेरशतः । धुक्षीमहि प्रजामिषं ॥ 36

### TS 3.1.11.3

ये ते सरस्व ऊर्मयो मधुमन्तो घृतश्रुतः । तेषां ते सुम्रमीमहे ॥ यस्य व्रतं पशवो यन्ति सर्वे  
यस्य व्रतमुपतिष्ठन्त आपः । यस्य व्रते पुष्टिपतिर्निविष्टस्तः सरस्वन्तमवसे हुवेम ॥ दिव्यं सुपर्णं  
वयसं बृहन्तमपां गर्भं वृषभमोषधीनां । अभीपतो वृष्ट्या तर्पयन्तं तः सरस्वन्तमवसे हुवेम ॥  
सिनीवालि पृथुष्टुके या देवानामसि स्वसा । जुषस्व हव्य - [ ] 37

### TS 3.1.11.4

माहुतं प्रजां देवि दिदिष्टि नः ॥ या सुपाणिः स्वङ्गुरिः सुषूमा बहुसूवरी । तस्यै विस्पत्नियै हविः  
सिनीवालयै जुहोतन ॥ इन्द्रं वो विश्वतस्परी > 5, न्द्रं नरः > 6 ॥ असितवर्णा हरयः सुपर्णा  
मिहो वसाना दिवमुत् पतन्ति ॥ त आऽववृत्रन्थ सदनानि कृत्वाऽऽदित् पृथिवी घृतैर्व्युद्यते ॥

हिरण्यकेशो रजसो विसारेऽहिर्धुनिर्वात इव ध्रजीमान् । शुचिभ्राजा उषसो - [ ] 38

### TS 3.1.11.5

नवेदा यशस्वतीरपस्युवो न सत्याः ॥ आ ते सुपर्णा अमिनन्त एवैः कृष्णो नोनाव वृषभो यदीदं । शिवाभिर्न स्मयमानाभिराऽगात् पतन्ति मिहः स्तनयन्त्यभ्रा ॥ वाश्रेवं विद्युन्मिमाति वृथ्सं न माता सिषक्ति । यदेषां वृष्टिरसर्जि ॥ पर्वतश्चिन्महि वृद्धो बिभाय दिवश्चिथ् सानु रेजत स्वने वः । यत् क्रीडथ मरुत - [ ] 39

### TS 3.1.11.6

ऋष्टिमन्त आप इव सद्भियञ्चो धवद्धे ॥ अभि क्रन्द स्तनय गर्भमा धा उदुन्वता परि दीया रथेन । दृतिः सु करष विषितं न्यञ्चः समा भवन्तुद्धता निपादाः ॥ त्वं त्या चिदच्युताऽग्ने पशुर्न यवसे । धामा ह यत् ते अजर वना वृश्चन्ति शिक्कसः ॥ अग्ने भूरीणि तव जातवेदो देव स्वधावोऽमृतस्य धाम । याश्च - [ ] 40

### TS 3.1.11.7

माया मायिना विश्वमिन्व त्वे पूर्वीः सन्दधुः पृष्टबन्धो ॥ दिवो नो वृष्टिं मरुतो ररीद्धं प्रपिन्वत वृष्णो अश्वस्य धाराः । अर्वाडेतेन स्तनयित्नुनेह्यपो निषिञ्चन्नसुरः पिता नः ॥ पिन्वन्त्यपो मरुतः सुदानवः पयो घृतवद्विदथैष्वा भुवः । अत्यं न मिहे वि नयन्ति वाजिनमुथ्सं दुहन्ति स्तनयन्तमक्षितं ॥ उदुप्रुतो मरुतस्ताः इयर्त वृष्टिं - [ ] 41

### TS 3.1.11.8

ये विश्वे मरुतो जुनन्ति । क्रोशाति गर्दा कन्येव तुन्ना पेरुं तुञ्जाना पत्येव जाया ॥ घृतेन द्यावापृथिवी मधुना समुक्षत पयस्वतीः कृणताऽऽप ओषधीः । ऊर्जं च तत्रं सुमतिं च पिन्वथ यत्रा नरो मरुतः सिञ्चथा मधु ॥ उदुत्यं >7, चित्रं >8 ॥ और्व-भृगुवच्छुचिमप्रवानवदा हुवे ।

अ॒ग्नि॑ः सं॒मु॒द्र॒वा॒स॒सं ॥ आ सु॒व॑ः सं॒वि॒तु॒र्य॒था॒ भ॒ग॑स्ये ( ) व भु॒जि॑ः हु॒वे । अ॒ग्नि॑ः सं॒मु॒द्र॒वा॒स॒सं  
॥ हु॒वे वा॒त॑स्वनं क॒विं प॒र्जन्य॑क्र॒न्धः॒ सह॑ः । अ॒ग्नि॑ः सं॒मु॒द्र॒वा॒स॒सं ॥ 42

(वी॒र - इ॒षः॑ - ह॒व्य - मु॒ष॒सो - म॒रु॒त - श्च॒ - वृ॒ष्टिं - भ॒ग॑स्य॒ - द्वा॒द॒श च॑) (A11)

**praSna korvai with starting padams of 1 to 11 anuvAkams :-**

(प्र॒जाप॑ति॒र॒का॒म॒य॒तै - ष॒ ते॒ गा॒य॒त्रो - य॒ज्ञ॑वै - प्र॒जाप॑ते॒र्जा॒य॒मा॒नाः - प्रा॒जाप॑त्या - यो वा अ॒य॑थादे॒व॒त  
- मि॒ष्ट॒गो - नि॒ग्रा॒भ्याः॑ स्थ॒ - यो वै दे॒वा - जु॒ष्टो - ऽग्नि॑ना॒ र॒यि - मे॒का॑द॒श )

**korvai with starting padams of 1, 11, 21 series of pa jCAtis :-**

(प्र॒जाप॑ति॒र॒का॒म॒य॒त - प्र॒जाप॑ते॒र्जा॒य॒मा॒ना - व्या॒य॑च्छ॒न्ते - म॒ह्य॑मि॒मा - न्मा॒या मा॒यि॒ना॒न् - द्वि॑च॒त्वा॒  
रि॑ः॒श॒त्)

**first and last padam of first praSnam of kANDam 3 :-**

(प्र॒जाप॑ति॒र॒का॒म॒य॒ता - ऽग्नि॑ः सं॒मु॒द्र॒वा॒स॒सं )

॥ हरिः॑ ॐ ॥ ॥ कृष्ण यजुर्वेदीय तैत्तिरीय संहितायां तृतीयकाण्डे प्रथमः प्रश्नः समाप्तः ॥

3.1.1 appendix

1. 3.1.11.1 - आ॒प्या॑यस्व >1

आ॒प्या॑स्व॒ समे॑तु ते वि॒श्वतः॑ सोम॒ वृष्णि॑यं ।

भवा॒ वाज॑स्य संग॒थे ॥ (Appearing in TS 4-2-7-4)

2. 3.1.11.1 - सन्ते॑ >2

सं ते॒ पया॑श्सि॒ समु॑ यन्तु॒ वाजाः॑ सं॒ वृष्णि॑यान् यभिमा॒तिषा॑हः ।

आ॒प्याय॑मानो अ॒मृता॑य सोम दि॒वि श्रवा॑स्युत्त॒मानि॑ धिष्व ॥

(Appearing in TS 4-2-7-4)

3 ऽ 4. 3.1.11.2 - प्र॒णो दे॒व्या >3, नो॑ दि॒वः >4

प्र॒णो दे॒वी सर॑स्वती॒ वाजे॑भिर्वा॒जिनी॑वती । धी॒नाम॑वि॒त्र्यव॑तु ॥

आ नो॑ दि॒वो बृ॑ह॒तः प॑र्व॒तादा॑ सर॑स्वती॒ यज॑ता ग॒न्तु य॒ज्ञं ।

हव॑ दे॒वी जु॑जुषा॒णा घृ॑ताची॒ शग्मां॑ नो॒ वाच॑मु॒शती॑ शृ॒णोतु॑ ।

(Appearing in TS 1.8.22.1)

5 ऽ 6. 3.1.11.4 - इन्द्र॑ँ॒ वो वि॒श्वत॑स्परी >5 , न्द्रं॑ नरः >6

इन्द्र॑ँ॒ वो वि॒श्वत॑स्परी॒ हवाम॑हे जने॒भ्यः । अ॒स्माक॑मस्तु के॒वलः ॥

इन्द्रं॑ नरो॒ नेम॑धि॒ता हव॑न्ते॒ यत्पा॑र्या॒ युन॑ज॒ते धि॒यस्ताः॑ ।

शूरो॑ नृषा॒ता श॑व॒सश्च॑का॒न आ गो॑म॒ति व्र॑जे भ॒जा त्व॑न्नः ॥

(Appearing in TS 1.6.12.1)

7 ऽ 8. 3.1.11.8 - उ॒दुत्यं॑ >7, चि॒त्रं >8 ।

उदु॑ त्यं जा॒तवे॑दसं दे॒वं वे॑हन्ति के॒तवः॑ । दृ॒शे वि॒श्वाय॑ सूर्य॑ ॥

चि॒त्रं दे॒वाना॑मुद॑गा॒दनी॑कं चक्षु॑ मि॒त्रस्य॑ वरु॑णस्याऽग्नेः ।  
आऽ प्रा॒ द्यावा॑पृथि॒वी अ॒न्तरि॑क्षः सूर्य॑ आ॒त्मा जग॑तस्त॒स्थुष॑श्च ॥

(Appearing in TS 1.4.43.1)



## 3.2 तृतीयकाण्डे द्वितीयः प्रश्नः - पवमानग्राहादीनां व्याख्येयानं

### TS 3.2.1.1

यो वै पवमानानामन्वारोहान् विद्वान् यजतेऽनु पवमानाना रोहति न पवमानेभ्योऽव च्छिद्यते  
श्येनोऽसि गायत्रच्छन्दा अनु त्वाऽऽरंभे स्वस्ति मा सं पारय सुपर्णोऽसि त्रिष्टुच्छन्दा अनु त्वाऽऽरंभे  
स्वस्ति मा सं पारय सघाऽसि जगतीछन्दा अनु त्वाऽऽरंभे स्वस्ति मा संपारयेत्याहते- [ ] 1

### TS 3.2.1.2

वै पवमानानामन्वारोहास्तान् य एवं विद्वान् यजतेऽनु पवमानाना रोहति न पवमानेभ्योऽव च्छिद्यते  
यो वै पवमानस्य सन्ततिं वेद सर्वमायुरेति न पुराऽऽयुषः प्रमीयते पशुमान् भवति विन्दते प्रजां  
पवमानस्य ग्रहा गृह्यन्तेऽथ वा अस्यैतेऽगृहीता द्रोणकलश आधवनीयः पूतभृत् तान् यदगृहीत्वो-  
पाकुर्यात् पवमानं वि - [ ] 2

### TS 3.2.1.3

च्छिन्द्यात् तं विच्छिद्यमानमद्ध्र्योः प्राणोऽनु विच्छिद्ये-तोपयामगृहीतोऽसि प्रजापतये त्वेति द्रोणक-  
लशमभि मृशेदिन्द्राय त्वेत्याधवनीयं विश्वेभ्यस्त्वा देवेभ्य इति पूतभृत् पवमानमेव तथ सं तनोति  
सर्वमायुरेति न पुराऽऽयुषः प्रमीयते पशुमान् भवति विन्दते प्रजां ॥ 3

(एते - वि - द्विचत्वारिंशच्च) (A1)

### TS 3.2.2.1

त्रीणि वाव सर्वानन्यथ तृतीयं सर्वानमव लुम्पन्त्यनश्शु कुर्वन्त उपाश्शुःहुत्वोपाश्शुपात्रेऽश्शुम-  
वास्य तन्तृतीयसवने ऽपिसृज्याभि पुणुयाद्यदाप्याययति तेनाश्शुमद्यदभिषुणोति तेनर्जीषि सर्वाण्येव  
तथ सर्वानन्यश्शुमन्ति शुक्रवन्ति समावद्दीर्याणि करोति द्वौ समुद्रौ विततावजूर्यौ पर्यावर्तते जठरेव

पादाः । तयोः पश्यन्तो अतिं यन्त्यन्यमपश्यन्तः - [ ] 4

#### TS 3.2.2.2

सेतुनाऽतिं यन्त्यन्यं ॥ द्वे द्रधंसी सतती वस्तु एकः केशी विश्वा भुवनानि विद्वान् । तिरोधायैत्य-  
सितं वसानः शुक्रमा दंते अनुहाय जायै ॥ देवा वै यद्यज्ञेऽकुर्वत तदसुरा अकुर्वत ते देवा एतं  
महायज्ञमपश्यन् तमतन्वताग्निहोत्रं व्रतमकुर्वत तस्माद् द्विव्रतः स्याद् द्विर्ह्यग्निहोत्रं जुह्वति पौर्णमासं  
यज्ञमग्नीषोमीयं - [ ] 5

#### TS 3.2.2.3

पशुमकुर्वत दार्यं यज्ञमाग्नेयं पशुमकुर्वत वैश्वदेवं प्रातस्सवनं -मकुर्वत वरुणप्रघासान् माद्व्यदिनं  
सवनं साकमेधान् पितृयज्ञं त्र्यम्बकां स्तृतीयसवनमकुर्वत तमेषामसुरा यज्ञं -मन्ववाजिगांसुन्  
तं नाऽन्ववायुन् तैऽब्रुवन्नद्धर्तव्या वा इमे देवा अभूवन्निति तदद्भ्यस्त्वां ऽद्भ्यस्त्वं ततो देवा अभवन्  
पराऽसुरा य एवं विद्वान्थु सोमेन यजते भवत्यात्मना परां ( ) ऽस्य भ्रातृव्यो भवति ॥ 6

(अपश्यन्तोऽ - अग्नीषोमीयं - मात्मना परा - त्रीणि च) (A2)

#### TS 3.2.3.1

परिभूरग्निं परिभूरिन्द्रं परिभूर्विश्वान् देवान् परिभूर्मां सह ब्रह्मवर्चसेन स नः पवस्व शं गवे शं  
जनाय शमवते शं राजन्नोषधीभ्यो ऽच्छिन्नस्य ते रयिपते सुवीर्यस्य रायस्पोषस्य ददितारः स्याम  
। तस्य मे रास्व तस्य ते भक्षीय तस्य त इदमुन्मृजे ॥ प्राणाय मे वर्चोदा वर्चसे पवस्वा पानाय  
व्यानाय वाचे - [ ] 7

#### TS 3.2.3.2

दक्षक्रतुभ्यां चक्षुभ्यां मे वर्चोदौ वर्चसे पवेथाः श्रोत्राया ऽऽत्मने ऽङ्गेभ्य आयुषे वीर्याय विष्णोरि-

न्द्रस्य विश्वेषां देवानां जठरमसि वर्चोदा मे वर्चसे पवस्व कोऽसि को नाम कस्मै त्वा कायं त्वा  
यं त्वा सोमेनातीतृपं यं त्वा सोमेनामीमदः सुप्रजाः प्रजया भूयासः सुवीरो वीरैः सुवर्चा वर्चसा  
सुपोषः पोषैर्विश्वेभ्यो मे रूपेभ्यो वर्चोदा- [ ] 8

#### TS 3.2.3.3

वर्चसे पवस्व तस्य मे रास्व तस्य ते भक्षीय तस्य त इदमुन्मृजे ॥ बुभूषन्नवैक्षेतैष वै पात्रियः  
प्रजापतिर्यज्ञः प्रजापतिस्तमेव तर्पयति स एनं तृप्तो भूत्याऽभि पवते ब्रह्मवर्चसकामोऽवैक्षेतैष वै पा-  
त्रियः प्रजापतिर्यज्ञः प्रजापतिस्तमेव तर्पयति स एनं तृप्तो ब्रह्मवर्चसेनाभि पवत आमयाव्य - [ ] 9

#### TS 3.2.3.4

वैक्षेतैष वै पात्रियः प्रजापतिर्यज्ञः प्रजापतिस्तमेव तर्पयति स एनं तृप्त आयुषाऽभि पवतेऽभिच-  
रन्नवैक्षेतैष वै पात्रियः प्रजापतिर्यज्ञः प्रजापतिस्तमेव तर्पयति स एनं तृप्तः प्राणापानाभ्यां वाचो  
दक्षक्रतुभ्यां चक्षुर्भ्यां श्रोत्राभ्यामात्मनोऽङ्गेभ्य आयुषोऽन्तरेति ताजक् प्र धन्वति ॥ 10

(वाचे-रूपेभ्यो वर्चोदा - आमयावी - पञ्चचत्वारिंशच्च) (A3)

#### TS 3.2.4.1

स्फ्यः स्वस्तिर्विघ्नः स्वस्तिः परशुर्वेदिः परशुर्नः स्वस्तिः । यज्ञियां यज्ञकृतः स्थ ते मास्मिन्  
यज्ञ उप ह्यद्धमुप मा द्यावापृथिवी ह्वयेतामुपाऽऽस्तावः कलशः सोमो अग्निरुप देवा उप यज्ञ  
उप मा होत्रा उपह्वे ह्वयन्तां नमोऽग्नये मखघ्नेमखस्य मा यशोऽर्यादित्याहवनीयमुप तिष्ठते यज्ञो  
वै मखो - [ ] 11

#### TS 3.2.4.2

यज्ञं वाव स तदेहन् तस्मा एव नमस्कृत्य सद्ः प्रसर्पत्यात्मनोऽनैत्यै नमो रुद्राय मखघ्ने नमस्कृत्या

मा पा॒हीत्याग्नी॑द्धं तस्मा॑ ए॒व न॑म॒स्कृत्य॑ स॒दुः प्र॑स॒र्पत्या॒त्मनो॑ऽना॒त्यै न॑म॒ इन्द्रा॑य म॒ख॒घ्न इन्द्रि॑यं मे  
वी॒र्यं॑ मा निर्व॑धीरिति॑ हो॒त्रीय॑मा॒शिषं॑मे॒वेता॑मा शी॒स्तैन्द्रि॑यस्य॑ वी॒र्यस्या॑निर्घा॒ताय॑ या वै - [ ] 12

#### TS 3.2.4.3

दे॒वताः॑ स॒दुस्या॑र्ति॒मा॒र्पय॑न्ति॒ यस्ता॑ वि॒द्वान् प्र॑स॒र्पति॑ न स॒दुस्या॑र्ति॒माच्छ॑ति॒ नमो॑ऽग्नये॑ म॒ख॒घ्न इत्या॑हैता  
वै दे॒वताः॑ स॒दुस्या॑र्ति॒मा॒र्पय॑न्ति॒ ता य॑ ए॒वं वि॒द्वान् प्र॑स॒र्पति॑ न स॒दुस्या॑र्ति॒माच्छ॑ति॒ दृढे॑ स्थः शिथि॑रे  
स॒मीची॑ माऽ॒हंस॑पातः॒ सूर्यो॑ मा दे॒वो दि॒व्याद॑हंस॒पातु॑ वा॒युर॑न्तरि॒क्षा - [ ] 13

#### TS 3.2.4.4

द॒ग्निः पृ॑थि॒व्या य॑मः पि॒तृभ्यः॑ स॒रस्व॑ती म॒नुष्यै॑भ्यो दे॒वी द्वा॒रौ मा॒ मा सं ता॑सं न॒मः स॒दसे॑ न॒मः  
स॒दस॑स्प॒तये॑ न॒मः स॒खीनां॑ पु॒रोगा॑णां चक्षु॑षे न॒मो दि॒वे न॒मः पृ॑थि॒व्या अ॒हे दै॒धिष॑व्योद॒तस्ति॑ष्ठाऽन्य॑स्य  
स॒दने॑ सी॒दु यो॑ऽस्मत् पा॒क॒तर॑ उ॒न्निव॑त् उ॒दुद्ध॑तश्च गे॒षं पा॒तं मा॑ द्या॒वापृ॑थि॒वी अ॒द्याहः॑ स॒दो वै प्र॑स॒र्पन्तं॑  
- [ ] 14

#### TS 3.2.4.5

पि॒तरो॑ऽनु प्र॑स॒र्पन्ति॑ त ए॒नमी॑श्व॒रा हि॒सि॒तोः स॒दः प्र॑सृ॒प्य दक्षि॑णा॒र्द्धं प॑रे॒क्षेता॑ऽग॒न्त पि॑तरः पि॒तृमा॑न॒हं  
यु॒ष्माभि॑र्भूयासः॒ सुप्र॑जसो॒ मया॑ यू॒यं भू॒यास्ते॑ति॒ तेभ्य॑ ए॒व न॑म॒स्कृत्य॑ स॒दुः प्र॑स॒र्पत्या॒त्मनो॑ऽना॒त्यै ॥  
15

(म॒खो - वा - अ॒न्तरि॑क्षात् - प्र॒स॒र्पन्तं - त्रय॑स्त्रि॒शच्च) (A4)

#### TS 3.2.5.1

भक्षे॑हि॒ मा ऽऽवि॑श दी॒र्घायु॑त्वाय॑ श॒न्तनु॑त्वाय॑ रा॒यस्पो॑षाय॑ व॒र्चसे॑ सुप्र॒जास्त्वा॑येहि॑ वसो॒ पुरो॑ वसो॒  
प्रि॒यो मे॑ हृदो॑ऽस्य॒श्चिनो॑स्त्वा बा॒हुभ्या॑ः स॒ध्यासं॑ नृ॒चक्ष॑सं त्वा दे॒व सोम॑ सु॒चक्षा॑ अव॑ ख्ये॒षं म॒-

न्द्राऽभिभूतिः केतुर्यज्ञानां वाग्जुषाणा सोमस्य तृप्यतु मन्द्रा स्वर्वाच्यदितिरनाहत शीर्ष्णी वाग्जुषाणा सोमस्य तृप्यत्वेहि विश्वचरणे - [ ] 16

#### TS 3.2.5.2

शम्भूमयोभूः स्वस्ति मां हरिवर्णं प्रचरं क्रत्वे दक्षाय रायस्पोषाय सुवीरतायै मा मां राजन् वि बीभिषो मा मे हार्दि त्विषा वंधीः । वृषणे शुष्मायाऽऽयुषे वर्चसे ॥ वसुमद्-गणस्य सोम देव ते मतिविदः प्रातस्सवनस्य गायत्रछन्दस इन्द्रपीतस्य नराशः संपीतस्य पितृपीतस्य मधुमत उपहूतस्योपहूतो भक्षयामि रुद्रवद्-गणस्य सोम देव ते मतिविदो माद्व्यन्दिनस्य सवनस्य त्रिष्टुछन्दस इन्द्रपीतस्य नराशः संपीतस्य - [ ] 17

#### TS 3.2.5.3

पितृपीतस्य मधुमत उपहूतस्योपहूतो भक्षयाम्यादित्यवद्-गणस्य सोम देव ते मतिविदस्तृतीयस्य सवनस्य जगतीछन्दस इन्द्रपीतस्य नराशः संपीतस्य पितृपीतस्य मधुमत उपहूतस्योपहूतो भक्षयामि ॥ आप्यायस्व समेतु ते विश्वतः सोम वृष्णिंयं । भवा वाजस्य सङ्गथे ॥ हिन्वं मे गात्रा हरिवो गुणान् मे मा वितीतृषः । शिवो मे सप्तर्षीनुप तिष्ठस्व मा मेऽवाङ्गाभिमति - [ ] 18

#### TS 3.2.5.4

गाः ॥ अपाम् सोमममृता अभूमाऽदर्शं ज्योतिरविदाम देवान् । किमस्मान् कृणवदरातिः किमु धूर्तिरमृत मर्त्यस्य ॥ यन्म आत्मनो मिन्दाऽभूदग्निस्तत् पुनराऽहोर्जातवेदा विचरणे ॥ पुनरग्निश्चक्षुरदात्-पुनरिन्द्रो बृहस्पतिः । पुनर्मे अश्विना युवं चक्षुरा धत्तमक्ष्योः ॥ इष्टयजुषस्ते देव सोम स्तुतस्तोमस्य - [ ] 19

#### TS 3.2.5.5

शस्तोक्थस्य हरिवत् इन्द्रपीतस्य मधुमत उपहूतस्योपहूतो भक्षयामि ॥ आपूर्याः स्थाऽऽमा पूरयत

प्रजया॑ च॒ धने॑न च ॥ ए॒तत् ते॑ तत् ये च॒ त्वामन्वे॑तत् ते॑ पिताम॒ह प्र॑पिताम॒ह ये च॒ त्वामन्व॑त्र  
पितरो॑ यथाभा॒गं म॑न्द॒द्धं नमो॑ वः पितरो॑ रसा॒य नमो॑ वः पितरः॒ शुष्मा॑य॒ नमो॑ वः पितरो॑ जी॒वाय॒  
नमो॑ वः पितरः - [ ] 20

### TS 3.2.5.6

स्व॒धायै॑ नमो॑ वः पितरो॑ म॒न्यवे॑ नमो॑ वः पितरो॑ घो॒राय॒ पितरो॑ नमो॑ वो॒ य ए॒तस्मिन्॑ लो॒के-  
स्थ युष्मा॑स्तेऽनु॒ येऽस्मिन्॑ लो॒के मां तेऽनु॒ य ए॒तस्मिन्॑ लो॒के स्थ यू॒यं तेषां॑ वसि॒ष्ठो भू॒यास्त॑  
येऽस्मिन्॑ लो॒केऽहं॑ तेषां॑ वसि॒ष्ठो भू॒यासं॑ प्रजा॑पते॒ न त्वदे॒तान्य॒न्यो वि॒श्वां जा॒तानि॑ परि॒ता ब॑भूव । 21

### TS 3.2.5.7

यत् का॑मास्ते जुहुमस्तन्नो॑ अस्तु व॒यं स्या॑म॒ पत॑यो रयी॒णां ॥ दे॒वकृ॑त॒स्यैन॑सो ऽव॒यज॑नमसि  
मनु॑ष्यकृ॒त॒स्यैन॑सो ऽव॒यज॑नमसि पि॒तृकृ॑त॒स्यैन॑सो ऽव॒यज॑नमस्य॒प्सु धौ॒तस्य॑ सोम॒ देव॑ ते॒ नृभिः॑  
सु॒तस्ये॑ष्ट यंजुषः॑ स्तु॒तस्तो॑मस्य॒ शस्तो॑क्थस्य॒ यो भ॒क्षोअ॑श्च॒सनियो॑ गो॒सनि॑स्तस्य॒ ते पि॒तृभिर्भ॑क्षं  
कृ॒त॒स्यो-प॑हू॒त॒स्योप॑हूतो भक्षयामि ॥ 22

(वि॒श्वच॑र॒षणे॑ - त्रि॒ष्टुप्छ॑न्दस् इन्द्र॑पीतस्य॒ नरा॑शः स॑पीतस्या - ऽति॑ -स्तु॒तस्तो॑मस्य - जी॒वाय॒  
नमो॑ वः पितरो॑ - बभूव॑ - चतु॑श्च॒त्वारि॑श्शच्च) (A5)

### TS 3.2.6.1

म॒हीनां॑ पयो॑ऽसि वि॒श्वेषां॑ दे॒वानां॑ त॒नूर् ऋ॒द्ध्यास॑म॒द्य पृ॑ष॒तीनां॑ ग्र॒हं पृ॑ष॒तीनां॑ ग्र॒होऽसि॑ वि॒ष्णो-  
रु॒हद॑यम॒स्येक॑मिष॒ विष्णु॑स्त्वाऽनु॒ विच॑क्रमे भू॒तिर्दु॑द्वा घृ॒तेन॑ वर्द्धतां॒ तस्य॑ मे॒ष्टस्य॑ वी॒तस्य॑ द्रवि॑ण॒मा  
ग॑म्या॒ज्ज्योति॑रसि वैश्वान॒रं पृ॑श्नि॒ज्यै दु॑ग्धं॒ याव॑ती॒ द्यावा॑पृथि॒वी म॑हि॒त्वा याव॑च्च स॒प्त सि॒न्धवो॑ वि॒तस्थुः॑  
। ताव॑न्तमिन्द्र॒ ते - [ ] 23

### TS 3.2.6.2

ग्रहः सहोर्जा गृह्णाम्यस्तृतं ॥ यत् कृष्णशकुनः पृषदाज्यमवमृशेच्छूद्रा अस्य प्रमायुकाः स्युर्यच्छूद्रा  
ऽवमृशेच्छतुष्पादोऽस्य पशवः प्रमायुकाः स्युर्यथ स्कन्देद्-यजमानः प्रमायुकः स्यात् पशवो वै पृष-  
दाज्यं पशवो वा एतस्य स्कन्दन्ति यस्य पृषदाज्यः स्कन्दति यत् पृषदाज्यं पुनर्गृह्णाति पशून्वास्मै  
पुनर्गृह्णाति प्राणो वै पृषदाज्यं प्राणो वा - [ ] 24

### TS 3.2.6.3

एतस्य स्कन्दति यस्य पृषदाज्यः स्कन्दति यत् पृषदाज्यं पुनर्गृह्णाति प्राणमेवास्मै पुनर्गृह्णाति  
हिरण्यमवधाय गृह्णात्यमृतं वै हिरण्यं प्राणः पृषदाज्यममृतमेवास्य प्राणे दधाति शतमानं भवति  
शतायुः पुरुषः शतेन्द्रिय आयुष्येवेन्द्रिये प्रतितिष्ठत्यश्वमव ध्रापयति प्राजापत्यो वा अश्वः प्राजापत्यः  
प्राणः स्वादेवास्मै योनेः प्राणं ( ) निर्मिमीते वि वा एतस्य यश्छिद्यते यस्य पृषदाज्यः स्कन्दति  
वैष्णव्यर्चा पुनर्गृह्णाति यज्ञो वै विष्णुर्यज्ञेनैव यज्ञः सं तनोति ॥ 25

(ते - पृषदाज्यं प्राणो वै - योनेः प्राणं - द्वाविंशतिश्च) (A6)

### TS 3.2.7.1

देवं सवितरेतत् ते प्राऽऽह तत् प्र च सुव प्र च यज्ञ बृहस्पतिर्ब्रह्मा ऽऽयुष्मत्या ऋचो मा गात  
तनुपाथ् साम्नः सत्या व आशिषः सन्तु सत्या आकूतय ऋतं च सत्यं च वदत स्तुत देवस्य  
सवितुः प्रसवे स्तुतस्य स्तुतमस्यूजं मह्यः स्तुतं दुहामा मा स्तुतस्य स्तुतं गम्याच्छस्त्रस्य शस्त्र -  
[ ] 26

### TS 3.2.7.2

मस्यूजं मह्यः शस्त्रं दुहामा मा शस्त्रस्य शस्त्रं गम्या-दिन्द्रियावन्तो वनामहे धुक्षीमहि प्रजामिषं ॥  
सा मे सत्याऽऽशीर्देवेषु भूयाद्-ब्रह्मवर्चसं माऽऽ गम्यात् ॥ यज्ञो बभूव स आ बभूव सप्रजंज्ञे स

वावृधे । स देवानामधि-पतिर्बभूव सो अस्माः अधिपतीन् करोतु वयः स्याम पतयो रयीणां ॥  
यज्ञो वा वै - [ ] 27

### TS 3.2.7.3

यज्ञपतिं दुहे यज्ञपतिर्वा यज्ञं दुहे स यः स्तुतशस्त्रयोर्दोहम विद्वान्. यजते तं यज्ञो दुहे स इष्ट्वा  
पापीयान् भवति य एनयोर्दोहं विद्वान्. यजते स यज्ञं दुहे स इष्ट्वा वसीयान् भवति स्तुतस्य स्तु-  
तमस्यूजं मह्यः स्तुतं दुहामा मां स्तुतस्य स्तुतं गम्याच्छस्त्रस्य शस्त्रमस्यूजं मह्यः शस्त्रं दुहा ( )  
मा मां शस्त्रस्य शस्त्रं गम्यादित्याहैष वै स्तुतशस्त्रयोर्दोहस्तं य एवं विद्वान्. यजते दुह एव यस्मिन्  
वसीयान् भवति ॥ 28

(शस्त्रं - वै - शस्त्रन्दुहां - द्वाविंशतिश्च) (A7)

### TS 3.2.8.1

श्येनाय पत्वंने स्वाहा वट्श्स्वयमभिगूर्ताय नमो विष्टम्भाय धर्मणे स्वाहा वट्श्स्वयमभिगूर्ताय नमः  
परिधये जनुप्रथेनाय स्वाहा वट्श्स्वयमभिगूर्ताय नम ऊर्जे होत्राणाः स्वाहा वट्श्स्वयमभिगूर्ताय  
नमः पयसे होत्राणाः स्वाहा वट्श्स्वयमभिगूर्ताय नमः प्रजापतये मनवे स्वाहा वट्श्स्वयमभिगूर्ताय  
नम ऋतमृतपाः सुवर्वाट्स्वाहा वट्श्स्वयमभिगूर्ताय नमस्तृपन्ताः होत्रा मधोर्धृतस्य यज्ञपतिमृषय  
एनेसा - [ ] 29

### TS 3.2.8.2

ऽऽहुः । प्रजा निर्भक्ता अनुत्प्यमाना मध्व्यौ स्तोकावपु तौ रराध ॥ सं नस्ताभ्याः सृजतुविश्वकर्मा  
घोरा ऋषयो नमो अस्त्वेभ्यः । चक्षुष एषां मनसश्च सुन्धौ बृहस्पतये महि षद् द्युमन्त्रमः ॥  
नमो विश्वकर्मणे स उ पात्वस्माननन्यान्ध-सोमपान् मन्यमानः । प्राणस्य विद्वान्ध संमरे न धीर  
एनेश्चकृवान् महि बद्ध एषां ॥ तं विश्वकर्मन् - [ ] 30



**TS 3.2.8.3**

-प्र मुञ्चा स्वस्तये ये भक्षयन्तो न वसून्यानृहुः । यानुग्रयोऽन्वतप्यन्त धिष्णि॑या इ॒यं तेषा॑मव॒या  
दुरि॑ष्ट्यै स्वि॑ष्टिं न॒स्तां कृ॑णोतु वि॒श्वकर्मा ॥ नमः॑ पि॒तृभ्यो॑ अ॒भि ये नो॒ अख्य॑न् यज्ञ॒कृतो॑ य॒ज्ञका॑माः  
सुदे॒वा अ॑का॒मा वो दक्षि॑णां न नी॒निम॒ मा न॒स्तस्मा॒ देन॑सः पापयिष्ट । याव॑न्तो वै स॒दस्यो॑स्ते सर्वे  
दक्षि॑ण्यास्तेभ्यो॒ यो दक्षि॑णां न- [ ] 31

**TS 3.2.8.4**

नये॑दैभ्यो वृश्च्ये॒त यद्-वै॑श्व॒कर्म॑णानि जुहोति॑ स॒दस्या॑ने॒व तत् प्री॑णात्य॒स्मे दे॑वासो वपु॑षे चिकि॒त्सत॒  
यमा॒शिरा॒ दम्प॑ती वा॒मम॑श्नुतः । पु॒मान् पु॒त्रो जा॑यते वि॒न्दते॒ वस्व॑थ॒ विश्वे॑ अ॒रपा॑ ए॒धते॒ गृहः ॥  
आ॒शीर्दा॒या दम्प॑ती वा॒मम॑श्नुता॒मरि॑ष्टो रा॒यः स॒चता॑ः स॒मौक॑सा । य आ॒सिच॑थ॒ सं दु॑ग्धं कु॒म्भ्या  
स॒हेष्टे॑न॒ याम॑न्नमति॑ जहातु॒ सः ॥ सर्पि॑र्ग्री॒वी - [ ] 32

**TS 3.2.8.5**

पी॒व॒र्यस्य॑ जा॒या पी॒वानः॑ पु॒त्रा अ॒कृ॒शासो॑ अस्य । स॒हजा॑निर्यः सु॒मख॑स्यमा॒न इन्द्रा॑याऽऽ\*शि॒रः  
स॒ह कु॑म्भ्याऽदा॑त् ॥ आ॒शीर्मु॒ ऊर्ज॑मु॒त सु॑प्रजा॒स्त्वमि॑षं दधातु॒ द्रवि॑णः॒ सर्व॑र्चसं । सं ज॒यन् क्षेत्रा॑णि  
स॒हेसा॑ऽहमिन्द्र॒ कृण्व॑ानो अ॒न्याः अध॑रान्त्स॒पत्नान् ॥ भू॒तम॑सि भू॒ते मा॑ धा॒ मुख॑मसि॒ मुखं॑ भू॒यासं॑  
द्यावा॑पृथि॒वीभ्यां॑ त्वा॒ परि॑गृह्णामि॒ विश्वे॑ त्वा दे॒वा वैश्वान॑राः - [ ] 33

**TS 3.2.8.6**

प्र॒च्याव॑यन्तु दि॒वि दे॒वान् दृ॒हान्तरि॑क्षे वया॑सि पृथि॒व्यां पा॒रि॒वान् ध्रु॒वं ध्रु॒वेण॑ ह॒विषा॑ऽव॒ सोमं॑  
न॒याम॑सि । यथा॑ नः॒ सर्व॑मिज्जग॑दय॒क्ष्मः सु॑मना॒ अस॑त् । यथा॑ न॒ इन्द्र॑ इ॒द्विशः॑ के॒वलीः॒ सर्वाः॑  
स॒मन॑सः कर॑त् । यथा॑ नः॒ सर्वा॑ इ॒दिशो॑ऽस्माकं॒ के॒वली॑रसन्न॒ ॥ 34

(एनंसा - विश्वकर्मन् - यो दक्षिणां न - सर्पिर्ग्रीवी - वैश्वनुरा - श्रुत्वारिः शच्च) (A8)

#### TS 3.2.9.1

यद्वै होताऽद्धुर्यमभ्याह्वयते वज्रमेनमभि प्रवर्तयत्युक्थंशा इत्याह प्रातस्सवनं प्रतिगीर्य त्रीण्येतान्य-  
क्षराणि त्रिपदा गायत्री गायत्रं प्रातस्सवनं गायत्रियैव प्रातस्सवने वज्रमन्तर्द्धत्त उक्थं वाचीत्याह  
माद्व्यन्दिनः सवनं प्रतिगीर्य चत्वार्येतान्य-क्षराणि चतुष्पदा त्रिष्टुप् त्रैष्टुभं माद्व्यन्दिनः सवनं त्रिष्टुभैव  
माद्व्यन्दिने सवने वज्रमन्तर्द्धत्त- [ ] 35

#### TS 3.2.9.2

उक्थं वाचीन्द्रायेत्याह तृतीयसवनं प्रतिगीर्य सप्तैतान्यक्षराणि सप्तपदा शक्ररी शाक्रो वज्रो वज्रेणैव  
तृतीयसवने वज्रमन्तर्द्धत्ते ब्रह्मवादिनो वदन्ति स त्वा अद्धुर्यः स्याद्यो यथासवनं प्रतिगरे छन्दांसि  
सम्पादयेत् तेजः प्रातः सवन आत्मन् दधीतेन्द्रियं माद्व्यन्दिने सवने पशूः स्तृतीयसवन इत्युक्थंशा  
इत्याह प्रातस्सवनं प्रतिगीर्य त्रीण्येतान्यक्षराणि - [ ] 36

#### TS 3.2.9.3

त्रिपदा गायत्री गायत्रं प्रातस्सवनं प्रातस्सवन एव प्रतिगरे छन्दांसि संपादयत्यथो तेजो वै गायत्री  
तेजः प्रातः सवनं तेज एव प्रातस्सवन आत्मन् धत्त उक्थं वाचीत्याह माद्व्यन्दिनः सवनं प्रति-  
गीर्य चत्वार्येतान्यक्षराणि चतुष्पदा त्रिष्टुप् त्रैष्टुभं माद्व्यन्दिनः सवनं माद्व्यन्दिन एव सवने प्रतिगरे  
छन्दांसि संपादयत्यथो इन्द्रियं वै त्रिष्टुगिन्द्रियं माद्व्यन्दिनः सवन - [ ] 37

#### TS 3.2.9.4

-मिन्द्रियमेव माद्व्यन्दिने सवन आत्मन् धत्त उक्थं वाचीन्द्रायेत्याह तृतीयसवनं प्रतिगीर्य सप्तैता-  
न्यक्षराणि सप्तपदा शक्ररी शाक्राः पशवो जागंतं तृतीयसवनं तृतीयसवन एव प्रतिगरे छन्दांसि  
संपादयत्यथो पशवो वै जगती पशवस्तृतीयसवनं पशूनेव तृतीयसवन आत्मन् धत्ते यद्वै होताऽद्धु-

युमभ्याह्वयंत आव्यमस्मिन् दधाति तद्यन्त्रा - [ ] 38

### TS 3.2.9.5

प॒हनी॑त पु॒राऽस्य॑ सँव॒त्स॒राद्-गृ॒ह आ वे॑वीरु॒ञ्छोऽ॒सा मोद॑ इवेति॑ प्र॒त्याह्व॑यते तेनै॒व तदपं॑ ह॒ते यथा॑ वा  
आय॑तां प्र॒तीक्ष॑त ए॒वम॑द्भ्युः प्र॒तिग॑रं प्र॒तीक्ष॑ते यद॑भि प्र॒तिगृ॑णीयाद्यथा ऽऽय॑तया स॒मृच्छ॑ते ता॒द्यगे॑व  
तद्यद॑र्द्ध॒र्चा॒लुप्ये॑त् यथा॒ धाव॑द्भ्यो ही॒यते॑ ता॒द्यगे॑व तत् प्र॒बाहु॑ग्वा ऋ॒त्विजा॑मु॒द्गीथा॑ उ॒द्गीथ॑ ए॒वोद्-गा॑तृणा  
- [ ] 39

### TS 3.2.9.6

मृ॒चः प्र॑ण॒व उ॑क्थश॒सिना॑ प्रति॒ग॒रोऽद्भ्यु॑णां॒ य एवं॑ वि॒द्वान् प्र॑तिगृणात्य॒न्नाद॑ ए॒व भ॑व॒त्याऽस्य॑ प्र॒जाया॑  
वा॒जी जा॑यत इ॒यं वै होता॑ऽसाव॒द्भ्युर्य॑दासीन्ः श॒ संत्य॑स्या ए॒व तद्धो॑ता नै॒त्यास्तं॑ इ॒व ही॑यमथो  
इ॒मामे॒व तेन॑ यज॑मानो दुहे॒ यत् तिष्ठ॑न् प्र॒तिगृ॑णात्य॒मुष्या॑ ए॒व तद॑द्भ्यु॒र्नैति॑ - [ ] 40

### TS 3.2.9.7

तिष्ठ॑तीव॒ ह्य॑सावथो॑ अ॒मूमे॒व तेन॑ यज॑मानो दुहे॒ यदा॑सीन्ः श॒संति॑ तस्मा॑दितः प्र॒दानं॑ दे॒वा उप॑  
जीव॑न्ति यत् तिष्ठ॑न् प्र॒तिगृ॑णाति॒ तस्मा॑दु॒मुतः॑ प्र॒दानं॑ मनु॒ष्या उप॑ जीव॑न्ति यत् प्रा॒डासीन्ः॑ श॒संति॑  
प्र॒त्यङ् तिष्ठ॑न् प्र॒तिगृ॑णाति॒ तस्मा॑त् प्रा॒चीनः॑ रे॒तो धी॑यते प्र॒तीचीः॑ प्र॒जा जा॑यन्ते॒ यद्वै होता॑ऽद्भ्यु॒मभ्या॑ह्वय॑ते वज्र॑मे॒नम॒भि प्र॑वर्तयति॒ ( ) परा॑डा वर्त॑ते वज्र॑मे॒व तन्नि॑ करोति॒ ॥ 41

(सर्व॑ने वज्र॑मन्तर्ध॑ते - त्री॒ण्ये॒तान्य॒क्षरा॑णी - न्द्रि॒यं मा॒ध्यन्दि॑नः॒ सर्व॑नं - नो - द्वा॑तृणा - म॒ध्व-  
र्यु॒र्नैति॑ - वर्त॑यत्य॒ - ष्ठा च॑) (A9)

### TS 3.2.10.1

उ॒प॒या॒मगृ॑हीतोऽसि वा॒क्षस॑द॒सि वा॒क्पा॒भ्यां त्वा ऋ॒तुपा॒भ्याम॒स्य य॒ज्ञस्य॑ ध्रु॒वस्याऽद्भ्य॑-क्षा॒भ्यां गृ॒हा-

3.2 तृतीयकाण्डे द्वितीयः प्रश्नः - पवमानग्राहादीनां व्याख्यानं <https://www.vedavms.in> 27

म्युपयामगृहीतोऽस्यृतसदसि चक्षुष्पाभ्यां त्वा क्रतुपाभ्यामस्य यज्ञस्य ध्रुवस्याऽद्वयक्षाभ्यां गृह्याम्यु-  
पयामगृहीतोऽसि श्रुतसदसि श्रोत्रपाभ्यां त्वा क्रतुपाभ्यामस्य यज्ञस्य ध्रुवस्याऽद्वयक्षाभ्यां गृह्यामि  
देवेभ्यस्त्वा विश्वदेवेभ्यस्त्वा विश्वेभ्यस्त्वा देवेभ्यो विष्णवुरुक्रमैष ते सोमस्तः रक्षस्व - [ ] 42

### TS 3.2.10.2

तं ते दुश्चक्षा माऽव ख्यन्मयि वसुः पुरोवसुर्वाक्पा वाचं मे पाहि मयि वसुर्विदद्वसुश्चक्षुष्पाश्चक्षुर  
मे पाहि मयि वसुः सँयद्वसुः श्रोत्रपाः श्रोत्रं मे पाहि भूरसि श्रेष्ठो रश्मीनां प्राणपाः प्राणं मे पाहि  
धूरसि श्रेष्ठो रश्मीनामपानपा अपानं मे पाहि यो न इन्द्रवायू मित्रावरुणा-वश्विनावभिदासंति भ्रातृव्य  
( ) उत्पिपीते शुभस्पती इदमहं तमधरं पादयामि यथेन्द्राऽहमुत्तमश्चेतयानि ॥ 43

(रक्षस्व - भ्रातृव्य - स्रयोदश च) (A10)

### TS 3.2.11.1

प्र सो अग्ने तवोतिभिः सुवीराभिस्तरति वाजकर्मभिः । यस्य त्वः सख्यमाविंथ ॥ प्र होत्रे पूर्व्यं  
वचोऽग्नये भरता बृहत् । विपां ज्योतींषि बिभ्रते न वेधसे ॥ अग्ने त्री ते वाजिना त्री षधस्थां  
तिस्रस्ते जिह्वा ऋतजात पूर्वीः । तिस्र उ ते तनुवो देववातास्ताभिर्नः पाहि गिरो अप्रयुच्छन् ॥  
सं वाम् कर्मणा समिषा - [ ] 44

### TS 3.2.11.2

हिंनोमीन्द्रा-विष्णू अपंसस्पारे अस्य । जुषेथां यज्ञं द्रविणं च धत्तमरिष्टैर्नः पृथिभिः पारयन्ता ॥  
उभा जिग्यथुर्न परां जयेथे न परां जिग्ये कतरश्चनैनोः । इन्द्रश्च विष्णो यदपस्पृधेथां त्रेधा सहस्रं  
वि तदैरयेथां ॥ त्रीण्यायूषि तव जातवेदस्तिस्त्र आजानीरुषसंस्ते अग्ने । ताभिर्देवानामवो यक्षि  
विद्वानथा - [ ] 45

**TS 3.2.11.3**

-भव॑ यज॑मानाय॒ शँयोः॑ ॥ अ॒ग्नि॒स्त्रीणि॑ त्रिधात॒न्या॑ क्षेति वि॒दथा॑ क॒विः । स त्री॑श्च॒रेका॑द॒शाः॑ इ॒ह ॥  
यक्ष॑च्च पि॒प्रय॑च्च नो॒ विप्रो॑ दूतः॒ परि॑ष्कृतः । नभ॑न्तामन्य॒के संमे॑ ॥ इन्द्रा॑विष्णू दृ॒श्हिताः॑ शम्बर॑स्य॒  
नव॑ पुरो॒ नव॑तिं च॒- श॒जथि॑ष्टं । श॒तं व॒र्चिनः॑ स॒हस्रं॑ च सा॒कः॑ ह॒थो अ॑प्र॒त्यसु॑रस्य वी॒रान् ॥ उ॒त  
मा॒ता म॑हिष॒ मन्वे॑नदुमी त्वा॑ ( ) जहति पु॒त्र दे॒वाः । अथा॑ब्रवीद्-वृ॒त्रमिन्द्रो॑ हनि॒ष्यन्थ॑-सखे॒ विष्णो॑  
वितु॑रं॒ विक्र॑मस्व ॥ 46

(इषा - ऽथ - त्वा - त्रयोदश च) (A11)

**praSna korvai with starting padams of 1 to 11 anuvAkams :-**

(यो वै पव॑मानानां॒ - त्रीणि॑ - परि॒भूरः॑ - स्फ्यः॑ स्व॒स्ति - भ॑क्षेहि॒ - मही॒नां पयो॑ऽसि॒ - दे॒व  
सवि॑तरे॒तत्ते॑ - श्ये॒नाय॑ - यद्वै होतो॑ - पया॒मगृ॑हीतोऽसि वाक्ष॑सत् - प्र सो अ॑ग्र - एका॑दश )

**korvai with starting padams of 1, 11, 21 series of pa jCAtis :-**

(यो वै - स्फ्यः॑ स्व॒स्तिः - स्व॒धायै॑ नमः॒ - प्रमु॑ञ्च - तिष्ठ॑तीव॒ - षट्त्वारि॑ंशत् )

**first and last padam of Second praSnam of kANDam 3 :-**

(यो वै पव॑मानानां॒ - विक्र॑मस्व)

॥ हरिः॑ ॐ ॥ ॥ कृष्ण यजुर्वेदीय तैत्तिरीय संहितायां तृतीयकाण्डे द्वितीयः प्रश्नः समाप्तः ॥

### 3.3 तृतीयकाण्डे तृतीयः प्रश्नः - वैकृतविधीनामभिधानं

#### TS 3.3.1.1

अग्ने॑ तेज॒स्विन् तेज॒स्वी त्वं दे॒वेषु॑ भूया॒स्तेज॑स्वन्तं॒ मामायु॑ष्मन्तं॒ वर्च॑स्वन्तं॒ मनु॑ष्येषु कुरु दी॒क्षायै॑  
च त्वा॒ तप॑सश्च तेज॑से जुहोमि तेजो॒विद॑सि तेजो॑ मा॒ मा हा॑सीन्माऽहं तेजो॑ हासिषं॒ मा मां तेजो॑  
हासी॒दिन्द्रौ॑जस्विन्नो॒जस्वी त्वं दे॒वेषु॑ भूया॒ ओज॑स्वन्तं॒ मामायु॑ष्मन्तं॒ वर्च॑स्वन्तं॒ मनु॑ष्येषु कुरु ब्रह्म॑णश्च  
त्वा क्ष॒त्रस्य॑ चौ - [ ] 1

#### TS 3.3.1.2

- ज॑से जुहो॒म्योजो॒विद॒स्योजो॑ मा॒ मा हा॑सीन्माऽहमोजो॑ हासिषं॒ मा मामोजो॑ हासी॒थ सूर्य॑ भ्राजस्विन्  
भ्राज॒स्वी त्वं दे॒वेषु॑ भूया॒ भ्राज॑स्वन्तं॒ मामायु॑ष्मन्तं॒ वर्च॑स्वन्तं॒ मनु॑ष्येषु कुरु वा॒योश्च॑ त्वाऽपाञ्च॒ भ्राज॑से  
जुहोमि॒सुव॑र्विद॑सि सुव॑र्मा॒ मा हा॑सीन्माऽहं सुव॑र्मा॒ हासिषं॒ मा मा सुव॑र्मा॒ हासीन् मयि॑ ( ) मे॒धां मयि॑  
प्र॒जां मय्य॑ग्निस्तेजो॑ दधातु मयि॑ मे॒धां मयि॑ प्र॒जां मयीन्द्र॑ इन्द्रि॒यं द॑धातु मयि॑ मे॒धां मयि॑ प्र॒जां मयि॑  
सूर्यो॑ भ्राजो॑ दधातु ॥ 2

(क्ष॒त्रस्य॑ च - मयि॑ - त्रयो॑वि॒ंशति॑श्च) (A1)

#### TS 3.3.2.1

वा॒युर॒हि॒क॑र्ताऽग्निः प्र॑स्तो॒ता प्र॒जाप॑तिः साम् बृ॒हस्प॑तिरु॒द्गाता विश्वे॑ दे॒वा उ॑पगा॒तारो म॑रुतः॒ प्रति॑ह॒र्तार॑  
इन्द्रो॑ नि॒धन॑न्ते दे॒वाः प्रा॑णभृ॒तः प्रा॑णं मयि॑ दध॒त्वेत॑द्वै सर्व॑म॒द्भ्यु॒रुपा॑कुर्वन्नु॒द्गात॑भ्यं उ॒पाक॑रोति ते दे॒वाः  
प्रा॑णभृ॒तः प्रा॑णं मयि॑ दध॒त्वेत्या॑हैतदे॒व सर्व॑मा॒त्मन् ध॑त्त इडां दे॒वहू॑र्मनु॑र्यज्ञ॒नीर्बृ॑हस्पतिरु॒क्थाम॑दानि  
श॒सिष॑द् विश्वे॑ दे॒वाः - [ ] 3

#### TS 3.3.2.2

सूक्तवाचः पृथिवि मातर्मा माहिःसी मधुं मनिष्ये मधुं जनिष्ये मधुंवक्ष्यामि मधुवदिष्यामि मधु-  
मतीं देवेभ्यो वाचमुद्यासः शुश्रूषेण्यां मनुष्येभ्यस्तं मां देवा अवन्तु शोभायै पितरोऽनु मदन्तु ॥ 4

(शःसिषद् विश्वे देवा - अष्टाविंशतिश्च) (A2)

### TS 3.3.3.1

वसवस्त्वा प्रवहन्तु गायत्रेण छन्दसाऽग्नेः प्रियं पाथ उपेहि रुद्रास्त्वा प्रवहन्तु त्रैष्टुभेन छन्दसेन्द्रस्य  
प्रियं पाथ उपेह्यादित्यास्त्वा प्रवहन्तु जागतेन छन्दसा विश्वेषां देवानां प्रियं पाथ उपेहि मान्दासु ते  
शुक्र शुक्रमा धूनोमि भन्दनासु कोतनासु नूतनासु रेशीषु मेषीषु वाशीषु विश्वभृत्सु माद्धीषु ककुहासु  
शक्करीषु - [ ] 5

### TS 3.3.3.2

शुक्रासु ते शुक्र शुक्रमा धूनोमि शुक्रं ते शुक्रेण गृह्णाम्यहो रूपेण सूर्यस्य रश्मिभिः ॥ आऽस्मि-  
न्नुग्रा अचुच्यवुर्दिवो धारा असश्चत ॥ ककुहः रूपं वृषभस्य रोचते बृहथ सोमः सोमस्य पुरोगाः  
शुक्रः शुक्रस्य पुरोगाः ॥ यत् ते सोमादीभ्यं नाम जागृवि तस्मै ते सोम सोमाय स्वाहोशिक त्वं  
देव सोम गायत्रेण छन्दसाऽग्नेः - [ ] 6

### TS 3.3.3.3

प्रियं पाथो अपीहि वशी त्वं देव सोम त्रैष्टुभेन छन्दसेन्द्रस्य प्रियं पाथो अपीह्यस्मत्सखा त्वं देव  
सोम जागतेन छन्दसा विश्वेषां देवानां प्रियं पाथो अपीह्या नः प्राण एतु परावत आऽन्तरिक्षाद्विस्परि  
। आयुः पृथिव्या अद्ध्यमृतमसि प्राणाय त्वा ॥ इन्द्राग्नी मे वर्चः कृणुतां वर्चः सोमो बृहस्पतिः  
( ) । वर्चो मे विश्वेदेवा वर्चो मे धत्तमश्विना ॥ दुधन्वे वा यदीमनु वोचद्ब्रह्माणि वेरु तत् । परि  
विश्वानि काव्या नेमिश्रुक्रमिवा भवत् ॥ 7

(शक्रैरीष्व - ग्रे - बृहस्पतिः - पञ्चविंशतिश्च) (A3)

#### TS 3.3.4.1

एतद्वा अ॒पां ना॑म॒धेयं॑ गु॒ह्यं यदा॑धा॒वा मा॒न्दा॑सु ते शु॒क्र शु॒क्रमा॑ धू॒नोमी॒त्याहा॒पामे॒व ना॑म॒धेये॑न गु॒ह्येन॑  
दि॒वो वृ॒ष्टि॒मव॑ रु॒न्धे शु॒क्रं ते शु॒क्रेण॑ गृ॒ह्णामी॒त्याहै॒तद्वा अ॒हो रू॒पं य॒द्रात्रिः॑ सूर्य॑स्य र॒श्मयो॑ वृ॒ष्ट्या  
ई॒शते॑ऽह ए॒व रू॒पेण॑ सूर्य॑स्य र॒श्मिभि॑र्दि॒वो वृ॒ष्टिं च्या॒वय॑त्याऽस्मि॑न्नु॒ग्रा - [ ] 8

#### TS 3.3.4.2

अ॒चुच्य॑वुरि॒त्याह॑ यथा॒यजु॑रे॒वैतत् क॑कु॒हः रू॒पं वृ॒षभ॑स्य॒ रोच॑ते बृ॒हदि॒त्याहै॒तद्वा अ॑स्य क॒कुहः॑ रू॒पं  
य॒द्-वृ॒ष्टी रू॒पेणै॒व वृ॒ष्टि॒मव॑ रु॒न्धे यत्ते॑ सो॒मादा॑भ्यं॒ नाम॑ जा॒गृवी॒त्याहै॒ष ह॒ वै ह॒विषा॑ ह॒विर्य॑जति॒ योऽदा॑-  
भ्यं गृ॒हीत्वा॑ सो॒माय॑ जु॒होति॑प॒रा वा ए॒तस्याऽऽ\*युः॑ प्रा॒ण ए॒ति - [ ] 9

#### TS 3.3.4.3

योऽं॑शुं गृ॒ह्णा॒त्या नः॑ प्रा॒ण ए॒तु प॒राव॑त् इ॒त्याहाऽऽ\*यु॑रे॒व प्रा॒णमा॑त्मन् ध॑त्ते ऽमृत॑मसि प्रा॒णाय॑ त्वेति॒  
हि॒र॑ण्यम॒भि व्य॑नित्य॒मृतं॑ वै हि॒र॑ण्यमा॒युः प्रा॒णोऽमृ॑ते॒नैवाऽऽ\*यु॑रा॒त्मन् ध॑त्ते श॒तमा॑नं भवति श॒तायुः॑  
पु॒रुषः॑ श॒तेन्द्रि॑य॒ आयु॑ष्ये॒वेन्द्रि॑ये प्र॒ति॑तिष्ठत्य॒प उप॑ स्पृशति भेष॒जं वा आपो॑ ( ) भेष॒जमे॒व कु॑रुते  
॥ 10

(उ॒ग्रा - ए॒त्या - प॒ - स्त्रीणि॑ च) (A4)

#### TS 3.3.5.1

वा॒युर॑सि प्रा॒णो ना॑म॒ सवि॑तुराधि॒पत्ये॑ऽपा॒नं मे॑ दा॒श्चक्षु॑रसि॒ श्रोत्रं॑ ना॒म धा॑तुराधि॒पत्य॑ आयु॑र्मे दा॒ रू॒-  
प॑म॒सि वर्णो॑ ना॒म बृ॒हस्प॑तेराधि॒पत्ये॑ प्र॒जां मे॑ दा॒ ऋ॒तम॑सि सु॒त्यं ना॑मेन्द्र॒स्याऽऽ\*धि॑पत्ये॒ क्षत्रं॑ मे॑ दा॒  
भू॒तम॑सि भव्यं॒ नाम॑ पि॒तृणा॑माधि॒पत्ये॑ऽपा॒-मोष॑धीनां॒ गर्भं॑ धा॒ ऋ॒तस्य॑ त्वा॒ व्यो॑मन॒ ऋ॒तस्य॑ - [ ] 11



**TS 3.3.5.2**

त्वा॒ विभू॑मन ऋ॒तस्य॑ त्वा॒ विध॑र्मण ऋ॒तस्य॑ त्वा॒ स॒त्याय॑र्तस्य॑ त्वा॒ ज्योति॑षे प्र॒जाप॑ति वि॒राज॑मपश्यत्  
तया॑ भू॒तं च॑ भव्यं॑ चा सृ॒जत् तामृ॑षिभ्यस्तिरोऽ॒दधा॑त् तां ज॒मद॑ग्निस्तप॑साऽ पश्यत् तया॒ वै स पृ॑श्नीन्  
कामा॑नसृजत् तत् पृ॒श्नीनां॑ पृ॒श्नित्वं॑ यत् पृ॒श्नो गृ॑ह्यन्ते पृ॒श्नीने॒व तैः कामा॑न् यज॑मानोऽ॒व रु॒न्धे  
वा॒युर॑सि प्रा॒णो - [ ] 12

**TS 3.3.5.3**

नामे॒त्याह॑ प्रा॒णापा॒नावे॒वाव॑ रु॒न्धे चक्षु॑रसि श्रो॒त्रं ना॒मे॒त्याहाऽऽयु॑रे॒वाव॑ रु॒न्धे रू॒पम॑सि वर्णो॑ ना॒मे॒त्याह॑  
प्र॒जामे॒वाव॑ रु॒न्धऋ॒तम॑सि स॒त्यं ना॒मे॒त्याह॑ क्ष॒त्रमे॒वाव॑ रु॒न्धे भू॒तम॑सि भव्यं॑ ना॒मे॒त्याह॑ प॒शवो॒ वा  
अ॒पामो॑षधीनां॒ गर्भः॑ प॒शूने॒वा - [ ] 13

**TS 3.3.5.4**

-व॑ रु॒न्ध ए॒ताव॑द्वै पुरु॑षं प॒रित॑स्तदे॒वाव॑ रु॒न्ध ऋ॒तस्य॑ त्वा॒ व्यो॑मन् इ॒त्याहे॒यं वा॑ ऋ॒तस्य॑ व्यो॑मे॒मामे॒-  
वाभि॑ ज॒यत्यृ॑तस्य॑ त्वा॒ विभू॑मन् इ॒त्याहाऽन्तरि॑क्षं॒ वा ऋ॒तस्य॑ विभू॑मान्तरि॑क्षमे॒वाभि॑ ज॒यत्यृ॑तस्य॑ त्वा॒  
विध॑र्मण॒ इत्या॑ह द्यौ॒र्वा ऋ॒तस्य॑ विध॑र्म दि॒वमे॒वाभि॑ ज॒यत्यृ॑तस्य॑- [ ] 14

**TS 3.3.5.5**

त्वा॒ स॒त्याये॒त्याह॑ दि॒शो वा॑ ऋ॒तस्य॑ स॒त्यं दि॒श ए॒वाभि॑ ज॒यत्यृ॑तस्य॑ त्वा॒ ज्योति॑ष इ॒त्याह॑ सु॒वर्गो॑  
वै लो॒क ऋ॒तस्य॑ ज्योतिः॑ सु॒वर्गमे॒व लो॒कम॒भि ज॒यत्ये॒ताव॑न्तो॒ वै दे॒वलो॒कास्ता॑ने॒वाभि॑ ज॒यति॑ द॒श  
संप॑द्यन्ते द॒शाक्ष॑रा वि॒राडन्नं॑ वि॒राड् वि॒राज्ये॒वान्नाद्ये॑ प्र॒ति॒तिष्ठ॑ति ॥ 15

(व्यो॑मन ऋ॒तस्य॑ - प्रा॒णः - प॒शूने॒व - विध॑र्म दि॒वमे॒वाभि॑ ज॒यत्यृ॑तस्य॑ - षट्त्वारि॑ंशच्च) (A5)

**TS 3.3.6.1**

देवा वै यद्-यज्ञेन नावारुन्धत् तत् परैरवारुन्धत् तत् पराणां परत्वं यत् परे गृह्यन्ते यदेव य-  
ज्ञेनारुन्धे तस्यावरुद्ध्यै यं प्रथमं गृह्णातीममेव तेन लोकमभि जयति यं द्वितीयमन्तरिक्षं तेन यं  
तृतीयममुमेव तेन लोकमभि जयति यदेते गृह्यन्ते एषां लोकानामभिजित्या - [ ] 16

**TS 3.3.6.2**

उत्तरेष्वहः स्वमुतोऽर्वाञ्चो गृह्यन्ते ऽभिजित्यैवेमां लोकान् पुनरिमं लोकं प्रत्यवरोहन्ति यत् पूर्वेष्वहः  
स्वितः पराञ्चो गृह्यन्ते तस्मादितः पराञ्च इमे लोका यदुत्तरेष्वहः स्वमुतोऽर्वाञ्चो गृह्यन्ते तस्मादमु-  
तोऽर्वाञ्च इमे लोकास्तस्मादयातयाम्नो लोकान् मनुष्या उप जीवन्ति ब्रह्मवादिनो वदन्ति कस्माथ  
सत्यादुद्भ्य ओषधयः सं भवन्त्योषधयो - [ ] 17

**TS 3.3.6.3**

मनुष्याणामन्नं प्रजापतिं प्रजा अनु प्रजायन्त इति परानन्विति ब्रूयाद्-यद्-गृह्णात्युद्भ्यस्त्वौषधीभ्यो गृ-  
ह्णामीति तस्मादुद्भ्य ओषधयः संभवन्ति यद्-गृह्णात्योषधीभ्यस्त्वा प्रजाभ्यो गृह्णामीति तस्मादोषधयो  
मनुष्याणामन्नं यद्-गृह्णाति प्रजाभ्यस्त्वा प्रजापतये गृह्णामीति तस्मात् प्रजापतिं प्रजा अनु प्रजायन्ते  
॥ 18

(अभिजित्यै - भवन्त्योषधयो - ऽष्टा चत्वारिंशच्च) (A6)

**TS 3.3.7.1**

प्रजापतिर्देवासुरानं सृजत् तदनु यज्ञोऽसृज्यत यज्ञं छन्दांसि ते विष्वञ्चो व्यक्रामन्थ सोऽसुराननु  
यज्ञोऽपौक्रामद्-यज्ञं छन्दांसि ते देवा अमन्यन्तामी वा इदमभूवन्. यद्-वयं स्म इति ते प्रजा-  
पतिमुपाऽधावन्थ सोऽब्रवीत्-प्रजापतिश्छन्दसां वीर्यमादाय तद्धः प्र दास्यामीति स छन्दसां वीर्य -  
[ ] 19

**TS 3.3.7.2**

मा॒दाय॒ तदे॑भ्यः प्राय॑च्छत् तदनु॒ छन्दा॑स्यपा॒ऽक्राम॑न् छन्दा॑सि य॒ज्ञस्ततो॑ दे॒वा अभ॑वन् परा॑ऽसुरा॒ य एवं॑ छन्द॑सां वी॒र्यं वे॒दाऽऽ श्रा॑वया॒ऽस्तु श्रौष॑ड् यज॒ ये यजा॑महे वष॑ट्कारो भव॑त्यात्मना॒ परा॑ऽस्य भ्रात॑र्यो भवति ब्रह्म॑वादिनो वदन्ति॒ कस्मै॑ कम॑द्धुर्युरा श्रा॑वयतीति॒ छन्द॑सां वी॒र्यायेति॑ ब्रूयादे॒ तद् वै - [ ] 20

**TS 3.3.7.3**

छन्द॑सां वी॒र्यमा॑ श्रा॑वया॒ऽस्तु श्रौष॑ड् यज॒ ये यजा॑महे वष॑ट्कारो य एवं॑ वेद॒ सर्वा॑र्यैरे॒व छन्दो॑भिरर्चति॒ यत् किं॑ चार्चति॒ यदिन्द्रो॑ वृ॒त्रमह॑न्न-मे॒द्धयं॑ तद्-यद्-यती॑नपाव॑पद-मे॒द्धयं॑ तदथ॒ कस्मा॑दैन्द्रो य॒ज्ञ आ स॑स्थातो॒रित्या॑हुरिन्द्र॑स्य वा ए॒षा य॒ज्ञिया॑ तनू॒र्यद्-य॒ज्ञस्तामे॒व त ( ) द्यज॑न्ति य एवं॑ वेदो॒पैनं॑ य॒ज्ञो न॑मति ॥ 21

(छन्द॑सां वी॒र्यं - वा - ए॒व त - दु॒ष्टौ च॑) (A7)

**TS 3.3.8.1**

आ॒युर्दा॑ अ॒ग्रे ह॒विषो॑ जुषा॒णो घृ॒तप्र॑तीको घृ॒तयो॑निरेधि । घृ॒तं पी॒त्वा मधु॑चारु॒ गव्यं॑ पि॒तेव॑पु॒त्रम॑भि रक्ष॑तादिमं ॥ आ वृ॑श्च्यते वा ए॒तद्-यज॑मानोऽग्नि॒भ्यां यदे॑नयोः शृ॒तं कृ॒त्याथा॑ऽन्यत्रा॑-वभृ॒थम॑वैत्या॒युर्दा॑ अ॒ग्रे ह॒विषो॑ जुषा॒ण इत्य॑वभृ॒थम॑वैष्यन् जु॒हुया॑दाहु॒त्यैवैनौ॑ शमयति॒ नाऽऽ\*र्ति॑माच्छति॒ यज॑मानो यत् कु॒सीदु॑ - [ ] 22

**TS 3.3.8.2**

मप्र॑तीतुं मयि॒ येन॑ य॒मस्य॑ ब॒लिना॒ चरा॑मि । इ॒हैव॑ सन् नि॒रव॑दये॒ तदे॒तत् तद॑ग्रे अ॒नृणो॑ भवामि । वि॒श्वंलो॒प वि॒श्वदा॑वस्य॒ त्वाऽऽस॑ञ्जु॒होम्य॒ग्धादे॒कोऽहु॒तादे॒कः स॑मस॒नादे॒कः । तेन॑ कृ॒ण्वन्तु॑ भेष॒जः

सद्ः सहो वरेण्यं ॥ अयं नो नभसा पुरः सस्फानो अभि रक्षतु । गृहाणामसमर्त्यै ब्रह्मो नो  
गृहा असन् ॥ स त्वन्नो - [ ] 23

#### TS 3.3.8.3

नभसस्पत ऊर्जं नो धेहि भद्रया । पुनर्नो नष्टमा कृधि पुनर्नो रयिमा कृधि ॥ देवं सस्फान  
सहस्रपोषस्येशिषे स नो रास्वाऽज्यानिः रायस्पोषः सुवीर्यः सँवथ्सुरीणाः स्वस्तिं ॥ अग्निर्वाव  
यम इयं यमी कुसीदं वा एतद्-यमस्य यजमान आ दत्ते यदोषधीभिर्वेदिः स्तृणाति यदनुपौष्य  
प्रयायाद्भीवबद्धमेन - [ ] 24

#### TS 3.3.8.4

ममुष्मिन् लोके नेनीयेरन् यत् कुसीदमप्रतीत्तं मयीत्युपौषतीहैव सन् यमं कुसीदं निरवदायानृणः  
सुवर्गं लोकमेतियदि मिश्रमिव चरेदञ्जलिना सक्तून् प्रदाव्ये जुहुयादेष वा अग्निर्वैश्वानरो यत् प्रदाव्यः  
स एवैनस्वदयत्यह्ना विधान्यामेकाष्टकायामपूपं चतुः शरावं पत्त्वा प्रातरेतेन कक्षमुपौषेद्यदि - [ ] 25

#### TS 3.3.8.5

दहति पुण्यसमं भवति यदि न दहति पापसममेतेन हस्म वा ऋषयः पुरा विज्ञानेन दीर्घसत्रमुप य-  
न्ति यो वा उपद्रष्टारमुप-श्रोतारमनुख्यातारं विद्वान् यजते सममुष्मिन् लोक इष्टापूर्तेन गच्छतेऽग्निर्वा  
उपद्रष्टा वायुरुपश्रोता ऽऽदित्योऽनुख्याता तान् य एवं विद्वान् यजते सममुष्मिन् लोक इष्टापूर्तेन  
गच्छते ऽयं नो नभसा पुर - [ ] 26

#### TS 3.3.8.6

इत्याहाग्निर्वै नभसा पुरोऽग्निमेव तदाहैतन्मे गोपायेति स त्वं नो नभसस्पत इत्याह वायुर्वै नभसस्प-  
तिर्वायुमेव तदाहैतन्मे गोपायेति देवं सस्फानेत्याहाऽसौ वा आदित्यो देवः सस्फान आदित्यमेव

तदा<sup>१</sup>हैतन्मे गोपायेति ॥ 27

(कुसीदं - त्वं न - एन - मोषेद्यदि - पुर - आदित्यमेव तदा<sup>१</sup>हैतन्मे गोपायेति) (A8)

### TS 3.3.9.1

एतं युवानं परि वो ददामि तेन क्रीडन्तीश्चरत प्रियेण । मा नः शाप्त जनुषां सुभागा रायस्पोषेण  
समिषा मदेम ॥ नमो महिम्न उत चक्षुषे ते मरुतां पितृस्तदहं गृणामि । अनु मन्यस्व सुयजां  
यजाम जुष्टं देवानामिदमस्तु हव्यं ॥ देवानामेष उपनाह आसीदुपां गर्भ ओषधीषु न्यक्तः । सोमस्य  
द्रुप्समवृणीत पूषा - [ ] 28

### TS 3.3.9.2

बृहन्नद्रिरभवत् तदेषां ॥ पिता वृथ्सानां पतिरघ्नियानामथो पिता मंहतां गर्गराणां । वृथ्सो ज-  
रायुं प्रतिधुक् पीयूषं आमिक्षा मस्तु घृतमस्य रेतः ॥ त्वां गावोऽवृणत राज्याय त्वां हवन्त  
मरुतः स्वर्काः । वर्षमन् क्षत्रस्य ककुभिं शिश्रियाणस्ततो न उग्रो वि भंजा वसूनि ॥ व्यृद्धेन  
वा एष पशुनां यजते यस्यैतानि न क्रियन्त एष ( ) ह त्वै समृद्धेन यजते यस्यैतानि क्रियन्ते ॥ 29

(पूषा - क्रियन्त एषौ - ऽष्टौ च) (A9)

### TS 3.3.10.1

सूर्यो देवो दिविषद्भ्यो धाता क्षत्राय वायुः प्रजाभ्यः । बृहस्पतिस्त्वा प्रजापतये ज्योतिष्मतीं जुहोतु  
॥ यस्यांस्ते हरितो गर्भोऽथो योनिर्हिरण्ययी । अङ्गान्यहुता यस्यै तां देवैः समजीगमं ॥ आ  
वर्तन वर्तय नि निवर्तन वर्तयेन्द्र नर्दबुद । भूम्याश्चतस्रः प्रदिशस्ताभिरा वर्तया पुनः ॥ वि ते भिनन्नि  
तकरीं वियोनिं वि गवीन्यौ । वि - [ ] 30

**TS 3.3.10.2**

मातरं॑ च पुत्रं॑ च वि गर्भं॑ च जरायुं॑ च ॥ ब॒हिस्ते॑ अस्तु बालि॑ति ॥ उ॒रु॒द्र॒प्सो वि॒श्वरूप॑ इन्दुः  
पव॑मानो धीरं॑ आनञ्ज॑ गर्भं॑ ॥ एक॑पदी द्वि॒पदी॑ त्रि॒पदी॑ चतु॑ष्पदी पञ्च॑पदी षट्प॑दी सप्त॑पद्यष्टा॑पदी भुव॑-  
नाऽनु॑ प्रथता॑ स्वाहा॑ ॥ म॒ही द्यौः पृथि॑वी च न इ॒मं यज्ञं॑ मि॒मिक्षतां॑ । पि॒पृता॑न्नो भरी॑मभिः ॥ 31

(ग॒वि॒न्यौ वि - चतु॑श्चत्वारि॑शच्च) (A10)

**TS 3.3.11.1**

इ॒दं वा॑मा॒स्ये ह॒विः प्रि॒यमिन्द्रा॑बृहस्पती । उ॒क्थं म॑द॒श्च श॑स्यते ॥ अ॒यं वा॑ परि॑ षिच्यते सोमं॑-  
इन्द्रा॑बृहस्पती । चारु॑र्मदा॒य पी॑तये ॥ अ॒स्मे इन्द्रा॑बृहस्पती र॒यिं ध॑त्त॒श्च श॑त॒ग्वि॒नं । अ॒श्वाव॑न्त॒श्च  
सह॑स्त्रि॒णं ॥ बृह॑स्पति॒र्नः परि॑पातु प॒श्चादु॑तोत्तर॑स्मा॒दध॑रादघा॒योः । इन्द्रः॑ पु॒रस्ता॑दु॒त म॑द्भ्यतो नः  
सखा॑ सखि॑भ्यो वरि॑वः कृ॒णोतु ॥ वि ते॑ विष्व॒ग्वात॑जूतासो अ॒ग्ने भामा॑सः - [ ] 32

**TS 3.3.11.2**

शु॒चे शु॒चं यश्च॑रन्ति । तु॒वि॒म्र॒क्षासो॑ दि॒व्या न॑वंग्वा॒ वना॑ वनन्ति धृष॑ता रु॒जन्तः ॥ त्वाम॑ग्ने॒ मानु॑षीरी॒-  
डते॑ विशो॑ होत्रा॒विदुं॑ वि॒विचि॑श्च रत्न॒धात॑मं । गुहा॑ सन्त॒श्च सु॑भग वि॒श्वदे॑र॒शतं॑ तु विष्म॒णस॑श्च सु॒यजं॑  
घृ॒तश्रियं॑ ॥ धा॒ता द॑दातु नो र॒यिमी॑शा॒नो जग॑त॒स्पतिः॑ । स नः॑ पू॒र्णेन॑ वाव॒नत् ॥ धा॒ता प्र॒जायां॑  
उ॒त रा॒य ई॑शे धा॒तेदं॑ वि॒श्वं भु॑वं न ज॒जान॑ । धा॒ता पु॒त्रं य॑ज॒मानाय॑ दा॒ता - [ ] 33

**TS 3.3.11.3**

तस्मा॑ उ ह॒व्यं घृ॒तव॑द्विधेम ॥ धा॒ता द॑दातु नो र॒यिं प्रा॒चीं जी॑वातु॒मक्षि॑तां । व॒यं दे॒वस्य॑ धीमहि  
सु॒मति॑श्च स॒त्यरा॑धसः ॥ धा॒ता द॑दातु दा॒शुषे॑ वसू॒नि प्र॒जाका॑माय मी॒ढुषे॑ दुरो॒णे । तस्मै॑ दे॒वा अ॒मृताः॑  
सं॒व्यय॑न्तां वि॒श्वे दे॒वासो॑ अ॒दि॒तिः स॒जोषाः॑ ॥ अनु॑ नोऽद्याऽनु॑मतिर्य॒ज्ञं दे॒वेषु॑ म॒न्यतां॑ । अ॒ग्निश्च॑  
ह॒व्यवा॑ह॒नो भ॑वतां दा॒शुषे॑ म॒यः ॥ अ॒न्वि॒दनु॑मते॒ त्वं - [ ] 34

**TS 3.3.11.4**

मन्यासै शञ्चनः कृधि । ऋत्वे दक्षाय नो हिनु प्रण आयूषि तारिषः ॥ अनु मन्यता-मनुमन्यमाना  
प्रजावन्तः रयिमक्षीयमाणं । तस्यै वयः हेडसि माऽपि भूम सा नो देवी सुहवा शर्म यच्छतु ॥  
यस्यामिदं प्रदिशि यद्विरोचतेऽनुमतिं प्रति भूषन्त्यायवः । यस्या उपस्थ उर्वन्तरिक्षः सा नो देवी  
सुहवा शर्म यच्छतु ॥ 35

**TS 3.3.11.5**

राकामहः सुहवाः सुष्टुती हुवे शृणोतु नः सुभगा बोधतु त्मना । सीव्यत्वपः सूच्याऽच्छिद्यमानया  
ददातु वीरः शतदायमुक्थ्यं ॥ यास्ते राके सुमतयः सुपेशसो याभिर्ददासि दाशुषे वसूनि ।  
ताभिर्नो अद्य सुमना उपागहि सहस्रपोषः सुभगे रराणा ॥ सिनीवालि >1, या सुपाणिः >2  
॥ कुहूमहः सुभगा विघ्ननापसमस्मिन् यज्ञे सुहवा जोहवीमि । सा नो ददातु श्रवणं ( ) पितृणां  
तस्यास्ते देवि हविषा विधेम ॥ कुहू-देवानाममृतस्य पत्नी हव्या नो अस्य हविषश्चिकेतु । सं  
दाशुषे किरतु भूरि वामः रायस्पोष चिकितुषे दधातु ॥ 36

(भामासो - दाता - त्व - मन्तरिक्षः सा नो देवी सुहवा शर्म यच्छतु -श्रवणं - चतुर्विंश-  
तिश्च) (A11)

**praSna korvai with starting padams of 1 to 11 anuvAkams :-**

(अग्ने तेजस्विन् - वायु - र्वसवस्त् - वैतद्वा अपां - वायुरसि प्राणो नाम - देवा वै यद्यज्ञेन -  
प्रजापति देवासुरा - नायुर्दा - एतं युवानः - सूर्यो देव - इदं वा - मेकादश)

**korvai with starting padams of 1, 11, 21 series of pa jcAtis :-**

(अग्ने तेजस्विन् - वायुरसि - छन्दसां वीर्यं - मातरञ्च - षट्त्रिंशत् )

3.3 तृतीयकाण्डे तृतीयः प्रश्नः - वैकृतविधीनामभिधानं <https://www.vedavms.in> 39

**first and last padam of Third praSnam of kANDam 3 :-**

(अग्ने तेजस्वि॑ - श्विक्रि॑तुषे दधातु )

॥ हरिः॑ ॐ ॥ ॥ कृष्ण यजुर्वेदीय तैत्तिरीय संहितायां तृतीयकाण्डे तृतीयः प्रश्नः समाप्तः ॥

3.3.1 AppEndix



3.3.11.5 - सिनीवालि > 1, या सुपाणिः > 2

सिनीवालि पृथुष्टुके या देवानामसि स्वसा ।

जुषस्व हव्य माहुतं प्रजां देवि दिदिद्धि नः ॥

या सुपाणिः स्वङ्गुरिः सुषूमा बहुसूवरी ।

तस्यै विश्पत्न्यै हविः सिनीवालयै जुहोतन ॥

(Appearing in TS- 3.1.11.4)

### 3.4 तृतीयकाण्डे चतुर्थः प्रश्नः - इष्टिहोमाभिधानं

#### TS 3.4.1.1

वि वा एतस्य यज्ञ ऋद्धयते यस्य हविरतिरिच्यते सूर्यो देवो दिविषद्भ्य इत्याह बृहस्पतिना चैवास्य प्रजापतिना च यज्ञस्य व्यृद्धमपि वपति रक्षांसि वा एतत् पशुः संचन्ते यदेकदेवत्यं आलब्धो भूयान् भवति यस्यांस्ते हरितो गर्भ इत्याह देवत्रैवेनां गमयति रक्षसामपहत्या आ वर्तन वर्तयेत्याह - [ ] 1

#### TS 3.4.1.2

ब्रह्मणैवैनमा वर्तयति वि ते भिनद्मि तकरीमित्याह यथायजुरेवैतदु- रुद्रप्सो विश्वरूप इन्दुरित्याह प्रजा वै पशव इन्दुः प्रजयैवेनं पशुभिः समर्द्धयति दिवं वै यज्ञस्य व्यृद्धं गच्छति पृथिवीमतिरिक्तं तद्यन्न शमयेदार्तिमाच्छेद्-यजमानो मही द्यौः पृथिवीच न इत्या - [ ] 2

#### TS 3.4.1.3

ह द्यावापृथिवीभ्यामेव यज्ञस्य व्यृद्धं चातिरिक्तं च शमयति नाऽऽर्तिमाच्छेति यजमानो भस्मनाऽभि समूहति स्वगाकृत्या अथो अनयोर्वा एष गर्भोऽनयोरेवेनं दधाति यदवद्येदति तद्वेचयेद्यन्नावद्येत् प- शोरालब्धस्य नावं द्येत् पुरस्तान्नाभ्यां अन्यदवद्ये-दुपरिष्टादन्यत् पुरस्ताद्वै नाभ्यै - [ ] 3

#### TS 3.4.1.4

प्राण उपरिष्टादपानो यावानेव पशुस्तस्यावं द्यति विष्णवे शिपिविष्टाय जुहोति यद्वै यज्ञस्यातिरिच्य- ते यः पशोर्भूमा या पुष्टिस्तद्-विष्णुः शिपिविष्टो ऽतिरिक्त एवातिरिक्तं दधात्यतिरिक्तस्य शान्त्या अष्टाप्रद्विरण्यं दक्षिणाऽष्टापदी ह्येषा ऽऽत्मा नवमः पशोरास्यां अन्तरकोश उष्णीषेणाऽऽर्विष्टितं भवत्येवमिव हि पशुरुल्बमिव ( ) चर्मैव मांसमिवास्थीव यावानेव पशुस्तमाप्त्वाऽव रुन्धेयस्यैषा यज्ञे प्रायश्चित्तिः क्रियते इष्ट्वा वसीयान् भवति ॥ 4

(वर्तयत्याह-न इति-वै नाभ्या-उल्बमिवै-कविःशतिश्च) (A1)

### TS 3.4.2.1

आ वा॑यो भूष शुचि॑पा॒ उप॑ नः स॒हस्रं॑ ते नि॒युतो॑ विश्ववार । उपो॑ ते अ॒न्धो म॒घम॑यामि॒ यस्य॑ देव  
दधि॑षे पूर्व॑पेयं ॥ आकू॑त्यै त्वा॒ कामा॑य त्वा स॒मृधै॑ त्वा कि॒क्किटा॑ ते मनः॑ प्र॒जाप॑तये स्वाहा॑ कि॒क्किटा॑  
ते प्रा॑णं वा॒यवे॑ स्वाहा॑ कि॒क्किटा॑ ते चक्षुः॑ सू॒र्याय॑ स्वाहा॑ कि॒क्किटा॑ ते श्रोत्रं॑ द्यावा॑पृथि॒वीभ्या॑ः स्वाहा॑  
कि॒क्किटा॑ ते वाचः॑ सर॑स्वत्यै स्वाहा- [ ] 5

### TS 3.4.2.2

त्वं तुरी॑या व॒शिनी॑ व॒शाऽसि॑ स॒कृद्यत् त्वा॒ मन॑सा॒ गर्भं॑ आऽश॑यत् । व॒शा त्वं व॒शिनी॑ गच्छ दे॒वान्धु-  
स॒त्याः सं॑न्तु यज॑मानस्य॒ कामाः॑ ॥ अ॒जाऽसि॑ रयि॒ष्ठा पृ॑थि॒व्याः सी॑दो॒र्द्धाऽन्तरि॑क्षमुप॑ तिष्ठस्व दि॒वि  
ते बृ॒हद्भाः॑ ॥ तन्तुं॑ त॒न्वन् रज॑सो भा॒नुमन्वि॑हि ज्योति॑ष्मतः प॒थो र॑क्ष धि॒या कृ॑तान् ॥ अनु॑ल्ब॒णं  
व॑यत् जो॒गुंवा॑मपो॒ मनु॑ ( ) भ॒व ज॒नया॑ दै॒व्यं ज॑नं ॥ मन॑सो ह॒विर॑सि प्र॒जाप॑ते॒र्वर्णो॑ गात्रा॑णां ते  
गात्र॑भाजो भूया॑स्म ॥ 6

(सरस्वत्यै स्वाहा - मनु - स्रयोदश च) (A2)

### TS 3.4.3.1

इ॒मे वै स॒हाऽऽस्तां॑ ते वा॒युर्व्य॑वा॒त् ते गर्भ॑मदधातां तः सोमः॑ प्राज॑नय-द॒ग्निर॑ग्रसत् स ए॒तं  
प्र॒जाप॑तिरा॒ग्नेय-म॒ष्टाक॑पालमपश्यत् तं निर॑वपत् तेनै॒वैना॑म॒ग्रेरधि॑ निर॑क्रीणात् तस्मा॑द॒प्यन्य॑दे॒वत्या-  
मा॒लभ॑मान आ॒ग्नेयम॒ष्टाक॑पालं पु॒रस्ता॑न्निर्व॑पेद॒ग्रेरे॒वैना॑मधि॑ निष्क्री॒याऽऽल॑भते यद् - [ ] 7

### TS 3.4.3.2

वा॒युर्व्य॑वा॒त् तस्मा॑द्-वा॒यव्या॑ यदि॒मे गर्भ॑मदधातां तस्मा॑द्-द्यावा॑पृथि॒व्या यथ॑ सोमः॑ प्राज॑नयद॒ग्निर॑ग्रसत्

तस्मादग्नीषोमीया यदुनयोर्वियत्योर्-वागवदुत् तस्माँथ सारस्वती यत् प्रजापतिरग्रेरधि निरक्रीणात्  
तस्माँत् प्राजापत्या सा वा एषा सर्वदेवत्या यदुजा वशा वायव्यामा लभेत भूतिकामो वायुर्वै क्षेपिष्ठा  
देवता वायुमेव स्वेन- [ ] 8

**TS 3.4.3.3**

भागधेयेनोप धावति स एवैनं भूतिं गमयति द्यावापृथिव्यामा लभेत कृषमाणः प्रतिष्ठाकामो दिव  
एवास्मै पर्जन्यो वरुषति व्यस्यामोषधयो रोहन्ति समर्द्धुकमस्य सस्यं भवत्यग्नीषोमीयामा लभेत यः  
कामयेतान्नवानन्नादः स्यामित्यग्निनैवान्नमव रुन्धे सोमेनान्नाद्य-मन्नवानेवान्नादो भवति सारस्वतीमा  
लभेत य - [ ] 9

**TS 3.4.3.4**

इँश्चरो वाचो वदितोः सन् वाचं नवदेद्-वाग्वै सरस्वती सरस्वतीमेव स्वेन भागधेयेनोप धावति  
सैवास्मिन् वाचं दधाति प्राजापत्यामा लभेत यः कामयेतानभिजितमभि जयेयमिति प्रजापतिः सर्वा  
देवता देवताभिरेवा-नभिजितमभि जयति वायव्ययोपाकरोति वायोरेवैनामवरुद्ध्याऽऽलभत आकूत्यै  
त्वा कामाय त्वे - [ ] 10

**TS 3.4.3.5**

त्याह यथायजुरेवैतत् किंकिटाकारं जुहोति किंकिटाकारेण वै ग्राम्याः पशवो रमन्ते प्राऽऽरुण्याः  
पतन्ति यत् किंकिटाकारं जुहोति ग्राम्याणां पशूनां धृत्यै पर्यग्नौ क्रियमाणे जुहोति जीवन्तीमेवैनाऽ  
सुवर्गं लोकं गमयति त्वं तुरीया वशिनी वशाऽसीत्याह देवत्रैवैनां गमयति सत्याः संन्तु यजमानस्य  
कामा इत्याहैष वै कामो - [ ] 11

**TS 3.4.3.6**

यजमानस्य यदनाँत् उद्वचं गच्छति तस्मादेवमाँहाऽजाऽसि रयिष्ठेत्याहै ष्वेवैनाँ लोकेषु प्रतिष्ठापयति

दिवि ते बृहद्भा इत्याह सुवर्ग एवास्मै लोके ज्योतिर् दधाति तन्तुं तन्वन् रजसो भानुमन्विहीत्या-  
हेमानेवास्मै लोकान् ज्योतिष्मतः करोत्यनुल्बणं वयत् जोगुवामप इत्या- [ ] 12

**TS 3.4.3.7**

-ह यदेव यज्ञ उल्बणं क्रियते तस्यैवैषा शान्तिर्मनुर्भव जनया दैव्यं जनमित्याह मानव्यो वै प्र-  
जास्ता एवाऽऽद्याः कुरुते मनसो हविरसीत्याह स्वगाकृत्यै गात्राणां ते गात्रभार्जो भूयास्मेत्याहा  
ऽऽशिषमेवैतामा शास्ते तस्यै वा एतस्या एकमेवा-देवयजनं यदालब्धायामभ्रो - [ ] 13

**TS 3.4.3.8**

भवन्ति यदालब्धायामभ्रः स्यादुप्सु वाप्रवेशयेथ सर्वा वा प्राश्जीयाद्यदुप्सु प्रवेशयेद्यश्वेशसं कुर्याथ  
सर्वामेव प्राश्जीयादिन्द्रियमेवाऽऽत्मन् धत्ते सा वा एषा त्रयाणामेवाव रुद्धा सँवत्सरसदः सह-  
स्रयाजिनो गृहमेधिनस्त एवैतया यजेरन् तेषामेवैषाऽऽसा ॥ 14

(यथ - स्वेन - सारस्वतीमा लभेत् यः - कामाय त्वा - कामो - ऽप इत्य - भ्रो - द्विचं-  
त्वारिंशच्च) (A3)

**TS 3.4.4.1**

चित्तं च चित्तिश्चाऽऽकूतं चाऽऽकूतिश्च विज्ञातं च विज्ञानं च मनश्च शक्करीश्च दरशश्च पूर्णमासश्च  
बृहच्च रथन्तरं च प्रजापतिर्जयानिन्द्राय वृष्णे प्रायच्छदुग्रः पृतनाज्येषु तस्मै विशः समनमन्त सर्वाः  
स उग्रः सहि हव्यो बभूवदेवासुराः सँयत्ता आसन्त्स इन्द्रः प्रजापतिमुपा ( ) धावत् तस्मा एताञ्ज-  
यान् प्रायच्छत् तानजुहोत् ततो वै देवा असुरानजयन् यदजयन् तज्जयानां जयत्वः स्पद्धमानेनैते  
होतव्या जयत्येव तां पृतनां ॥ 15

(उप - पञ्चविंशतिश्च) (A4)

**TS 3.4.5.1**

अग्निभूतानामधिपतिः समाऽवत्विन्द्रो ज्येष्ठानां यमः पृथिव्या वायुरन्तरिक्षस्य सूर्योदिवश्चन्द्रमा न-  
क्षत्राणां बृहस्पतिर्ब्रह्मणो मित्रः सत्यानां वरुणोऽपाः समुद्रः स्रोत्यानामन्नः साम्राज्यानामधिपति  
तन्माऽवतु सोम ओषधीनाः सविता प्रसवानाः रुद्रः पशूनां त्वष्टा रूपाणां विष्णुः पर्वतानां मरुतो  
गुणानामधिपतयस्ते मावन्तु पितरः पितामहाः परेऽवरे ( ) ततोस्ततामहा इह माऽवत । अस्मिन्  
ब्रह्मन्नास्मिन् क्षत्रेऽस्या-माशिष्यस्यां पुरोधायामस्मिन्-कर्मन्त्रस्यां देवहूत्यां ॥ 16

(अवरे - सुप्तदेश च) (A5)

**TS 3.4.6.1**

देवा वै यद्यज्ञेऽकुर्वत तदसुरा अकुर्वत ते देवा एतानभ्यातानानपश्यन्- तानभ्यातन्वत यदेवानां  
कर्माऽऽसीदाद्ध्यत तद्यदसुराणां न तदाद्ध्यत येन कर्मणेत्सेत् तत्र होतव्या ऋद्धोत्येव तेन कर्मणा  
यद्विश्वे देवाः समभर्न् तस्मा-दभ्याताना वैश्वदेवायत्-प्रजापतिर्जयान् प्रायच्छत् तस्माज्जयाः प्राजा-  
पत्या - [ ] 17

**TS 3.4.6.2**

यद्-राष्ट्रभृद्धी राष्ट्रमाऽददत् तद्-राष्ट्रभृताः राष्ट्रभृत्त्वं ते देवा अभ्यातानैरसुरानभ्यातन्वत जयैरजयन्-  
राष्ट्रभृद्धी राष्ट्रमाऽददत् यदेवा अभ्यातानैरसुरानभ्यातन्वत तदभ्यातानानामभ्यातानत्वं यज्जयैरजयन्  
तज्जयानां जयत्वं यद्-राष्ट्रभृद्धी राष्ट्रमाऽददत् तद्-राष्ट्रभृताः राष्ट्रभृत्त्वं ततो देवा अभवन् पराऽसुरा  
यो भ्रातृव्यवान् स्यात् स ( ) एतान् जुहुयादभ्यातानैरेव भ्रातृव्यान्भ्यातनुते जयैर्जयति राष्ट्रभृद्धी  
राष्ट्रमा दत्ते भवत्यात्मना पराऽस्य भ्रातृव्यो भवति ॥ 18

(प्राजापत्याः-सोऽष्टा देश च) (A6)

**TS 3.4.7.1**

ऋता॒षाड् ऋ॒तधा॑मा॒ऽग्नि-गन्ध॑र्वस्त-स्यौष॑धयो॒ऽप्सरस॑ ऊ॒र्जो॒ नाम॑ स इ॒दं ब्रह्म॑ क्ष॒त्रं पा॑तु ता इ॒दं ब्रह्म॑  
क्ष॒त्रं पा॑न्तु तस्मै॒ स्वाहा॑ ताभ्यः॒ स्वाहा॑ स॒ऽहितो॑ वि॒श्वसा॑मा॒ सूर्यो॑ गन्ध॑र्व-स्तस्य॒ मरी॑चयो॒ऽप्सरस॑  
आ॒युवः॑ सु॒षुम्नः॑ सूर्य॑ रश्मि-श्च॒न्द्रमा॑ गन्ध॑र्व-स्तस्य॒ नक्ष॑त्राण्य-प्सरसो॑ बे॒कुर॑योभुज्युः सु॒प॒र्णो य॒ज्ञो  
गन्ध॑र्व-स्तस्य॒ दक्षि॑णा अ॒प्सरस॑ स्त॒वाः प्र॒जाप॑ति-वि॒श्वक॑र्मा॒ मनो॑ - [ ] 19

**TS 3.4.7.2**

गन्ध॑र्वस्तस्य॒र्ख॒ सामा॑न्य-प्सरसो॒ वह्न्यै॑षिरो वि॒श्वव्य॑चा॒ वातो॑ गन्ध॑र्व-स्तस्या॒ऽऽ\*पो॑ ऽप्सरसो॑ मु॒दा-  
भुव॑नस्य प॒ते यस्य॑त उ॒परि॑ गृहा इ॒ह च॑ । स नो॑ रा॒स्वाज्या॑नि॒ऽ रा॒यस्पोष॑ऽ सु॒वीर्य॑ऽ संव॑त्स॒रीणा॑ऽ  
स्व॒स्तिं ॥ प॒रमे॑ष्ठ्यधि॒पति॑-मृ॒त्युर् गन्ध॑र्व-स्तस्य॒ विश्व॑म॒प्सरसो॑ भुवः॑ सु॒क्षितिः॑- सु॒भूति॑-भ॒द्रकृ॑थ सु॒-  
व॑र्वा॒न् पर्जन्यो॑ गन्ध॑र्व-स्तस्य॒ विद्यु॑तो॒ ऽप्सरसो॑ रु॒चो दू॑रे हे॒तिर॑-मृ॒डयो॑ - [ ] 20

**TS 3.4.7.3**

मृ॒त्युर्गन्ध॑र्व-स्तस्य॒ प्रजा॑ अ॒प्सरसो॑ भी॒रुव॑श्चरुः॒ कृप॑ण का॒शी कामो॑ गन्ध॑र्व-स्तस्या॒धयो॑ ऽप्सरसः॑  
शो॒चय॑न्ती॒र्नाम॑ स इ॒दं ब्रह्म॑ क्ष॒त्रं पा॑तु ता इ॒दं ब्रह्म॑ क्ष॒त्रं पा॑न्तु तस्मै॒ स्वाहा॑ ताभ्यः॒ स्वाहा॑ स नो॑  
भुव॑नस्य प॒ते यस्य॑त उ॒परि॑ गृहा इ॒ह च॑ । उ॒रु ब्रह्म॑णे॒ऽस्मै क्ष॑त्राय॒ महि॑ शर्म॒ यच्छ॑ ॥ 21

(मनो॑ - ऽमृ॒डयः॑ - षट्त्वारि॑ऽशच्च) (A7)

**TS 3.4.8.1**

रा॒ष्ट्रका॑माय होत॒व्या रा॒ष्ट्रं वै रा॑ष्ट्रभृ॒तो रा॒ष्ट्रेणै॑वास्मै॒ रा॒ष्ट्रम॑व॒ रुन्धे॑ रा॒ष्ट्रमे॒व भ॑वत्या॒त्मने॑ होत॒व्या रा॒ष्ट्रं वै  
रा॑ष्ट्रभृ॒तो रा॒ष्ट्रं प्र॒जा रा॒ष्ट्रं प॒शवो॑ रा॒ष्ट्रं य॒च्छेष्टो॑ भव॑ति रा॒ष्ट्रेणै॑व रा॒ष्ट्रम॑व॒ रुन्धे॑ वसि॑ष्ठः॒ समा॑नानां॒ भव॑ति  
ग्रा॒मका॑माय होत॒व्या रा॒ष्ट्रं वै रा॑ष्ट्रभृ॒तो रा॒ष्ट्रं संजा॑ता रा॒ष्ट्रेणै॑वास्मै॒ रा॒ष्ट्रं संजा॑तानव॒ रुन्धे॑ ग्रा॒म्ये - [

] 22

**TS 3.4.8.2**

-व भवत्यधिदेवने जुहोत्यधिदेवं एवास्मै सजातानवं रुन्धे त एनमवरुद्धा उपं तिष्ठन्ते रथमुख ओ-  
जस्कामस्य होतव्या ओजो वै राष्ट्रभृत ओजो रथ ओजसैवास्मा ओजोऽवं रुन्ध ओजस्व्येव भवति  
यो राष्ट्रादपभृतः स्यात् तस्मै होतव्या यावन्तोऽस्य रथाः स्युस्तान् ब्रूयाद् युद्धमिति राष्ट्रमेवास्मै  
युनक्त्या - [ ] 23

**TS 3.4.8.3**

हुतयो वा एतस्याक्वृत्ता यस्य राष्ट्रं न कल्पते स्वरथस्य दक्षिणं चक्रं प्रवृहं नाडीमभि जुहुयादाहु-  
तीरेवास्य कल्पयति ता अस्य कल्पमाना राष्ट्रमनु कल्पते संग्रामे संयन्ते होतव्या राष्ट्रं वै राष्ट्रभृतो  
राष्ट्रे खलु वा एते व्यायच्छन्ते ये संज्ञामः संयन्ति यस्य पूर्वस्य जुहति स एव भवति जयति  
तः संग्रामं मौन्धुक इद्धमो- [ ] 24

**TS 3.4.8.4**

भवत्यङ्गारा एव प्रतिवेष्टमाना अमित्राणामस्य सेनां प्रतिवेष्टयन्ति य उन्माद्येत् तस्मै होतव्या ग-  
न्धर्वाप्सरसो वा एतमुन्मादयन्ति य उन्माद्यत्येते खलु वै गन्धर्वाप्सरसो यद्राष्ट्रभृतस्तस्मै स्वाहा  
ताभ्यः स्वाहेति जुहोति तेनैवैनाञ्छमयति नैयग्रोध औदुम्बर आश्वत्थः प्लाक्ष इतीद्धमो भवत्येते वै  
गन्धर्वाप्सरसां गृहाः स्व एवैनां - [ ] 25

**TS 3.4.8.5**

नायतने शमयत्यभिचरता प्रतिलोमः होतव्याः प्राणानेवास्य प्रतीचः प्रति यौति तं ततो येन केन च  
स्तृणुते स्वकृत इरिणे जुहोति प्रदरे वैतद्वा अस्यै निरः क्रतिगृहीतं निरः क्रतिगृहीत एवैनं निरः क्रत्या  
ग्राहयति यद्वाचः क्रूरं तेन वर्षट् करोति वाच एवैनं क्रूरेण प्रवृश्चति ताजगार्तिमाच्छति यस्य का-



मयेता॑न्नाद्य - [ ] 26

#### TS 3.4.8.6

मा द॑दीयेति॑ तस्य॑ स॒भाया॑मुत्ता॒नो नि॒पद्य॑ भुव॑नस्य प॒तु इति॑ तृणा॑नि सं गृ॑हीयात् प्र॒जाप॑तिर्वै भुव॑नस्य प॒तिः प्र॒जाप॑तिनै॒वास्या॒न्नाद्य॑मा द॑त्त इ॒दम॑हम॒मुष्या॑ ऽऽ\*मुष्या॒यण॑स्या॒न्नाद्य॑ ह॒रामी॑त्या॒हान्नाद्य॑मे॒वास्य॑ हरति॑ ष॒ङ्गिर॒हरति॑ ष॒ङ्गा ऋ॒तवः॑ प्र॒जाप॑तिनै॒वास्या॒न्नाद्य॑मा॒दाय॑र्तवौ॑ ऽस्मा॒ अनु॑ प्रयच्छन्ति - [ ] 27

#### TS 3.4.8.7

यो ज्ये॑ष्ठब॒न्धुर॑प॒ भूतः॑ स्यात् तश्स्थले॑ऽवसाय्य॑ ब्रह्मौदु॑नं चतुः॑ शरा॒वं पु॒त्त्वा तस्मै॑ होत॒व्यां वर्ष्म॑ वै रा॒ष्ट्रभृ॑तो॒ वर्ष्म॑ स्थलं॑ वर्ष्म॑णै॒वैनं॑ वर्ष्म॑ समा॒नानां॑ गमयति॑ चतुः॑ शरा॒वो भव॑ति दि॒क्ष्वेव॑ प्र॒ति॑तिष्ठति क्षी॒रे भ॑वति रुच॑मे॒वास्मिन्॑ दधा॒त्युद्ध॑रति श्रु॒तत्वाय॑ स॒र्पिष्वान्॑ भवति मे॒द्व्यत्वाय॑ च॒त्वार॑ आ॒र॒षेयाः॑ प्राश॑न्ति दि॒शामे॒व ज्योति॑षि जुहोति ॥ 28

(ग्रामी - यु॑नक्ती - ध॒मः - स्व ए॒वैना॑ - न॒न्नाद्यं॑ - यच्छ॑न्त्ये - का॒न्न पञ्चा॒शच्च॑) (A8)

#### TS 3.4.9.1

दे॒र्विका॑ नि॒वर्पे॑त् प्र॒जाका॑म॒श्छन्दा॑सि॒ वै दे॒र्विका॑श्छन्दा॑सी॒व खलु॑ वै प्र॒जाश्छन्दा॑भिरे॒वास्मै॑ प्र॒जाः प्र॒ज॑नयति प्रथ॒मं धा॒तारं॑ करोति मिथु॒नी ए॒व तेन॑ करोत्यन्वे॒वास्मा॑ अनु॑मतिर्मन्यते रा॒ते रा॒का प्र॑ सि॒नीवा॒ली ज॑नयति प्र॒जास्वे॒व प्र॒जा॑तासु कु॒ह्वा वाचं॑ दधात्ये॒ता ए॒व नि॒वर्पे॑त् प॒शुका॑म॒श्छन्दा॑सि॒ वै दे॒र्विका॑श्छन्दा॑सी - [ ] 29

#### TS 3.4.9.2

व॒ खलु॑ वै प॒शव॑श्छन्दा॑भिरे॒वास्मै॑ प॒शून् प्र॒ज॑नयति प्रथ॒मं धा॒तारं॑ करोति प्रै॒व तेन॑ वापयत्यन्वे॒वास्मा॑ अनु॑मतिर्मन्यते रा॒ते रा॒का प्र॑ सि॒नीवा॒ली ज॑नयति प॒शूने॒व प्र॒जा॑तान् कु॒ह्वा प्र॑तिष्ठापयत्ये॒ता ए॒व

निर्वपेद्-ग्रामकामश्छन्दांसि वै देविकाश्छन्दांसी व खलु वै ग्रामश्छन्दोभिरेवास्मै ग्राम - [ ] 30

#### TS 3.4.9.3

मव रुन्धे मद्ध्यतो धातारं करोति मद्ध्यत एवैनं ग्रामस्य दधात्येता एव निर्वपेज्ज्योगामयावी छन्दांसि वै देविकाश्छन्दांसि खलु वा एतमभि मन्यन्ते यस्य ज्योगामयति छन्दोभिरेवैनं-मगदं करोति मद्ध्यतो धातारं करोति मद्ध्यतो वा एतस्याक्लृप्तं यस्य ज्योगामयति मद्ध्यत एवास्य तेन कल्पयत्येता एव नि - [ ] 31

#### TS 3.4.9.4

वपेद्यं यज्ञो नोपनमेच्छन्दांसि वै देविकाश्छन्दांसि खलु वा एतं नोप नमन्ति यं यज्ञो नोपनमति प्रथमं धातारं करोति मुखत एवास्मै छन्दांसि दधात्युपैनं यज्ञो नमत्येता एव निर्वपेदीजानश्छन्दांसि वै देविका यातयामानीव खलु वा एतस्य छन्दांसि य ईजान उत्तमं धातारं करो - [ ] 32

#### TS 3.4.9.5

-त्युपरिष्ठादेवास्मै छन्दांस्ययातयामान्यव रुन्ध उपैनमुत्तरो यज्ञो नमत्येता एव निर्वपेद्यं मेधा नोपनमेच्छन्दांसि वै देविकाश्छन्दांसि खलु वा एतं नोप नमन्ति यं मेधा नोपनमति प्रथमं धातारं करोति मुखत एवास्मै छन्दांसि दधात्युपैनं मेधा नमत्येता एव निर्वपे - [ ] 33

#### TS 3.4.9.6

द्रुक्कामश्छन्दांसि वै देविकाश्छन्दांसीव खलु वै रुक् छन्दोभिरेवास्मिन् रुचं दधातिक्षीरे भवन्ति रुचमेवास्मिन् दधति मद्ध्यतो धातारं करोति मद्ध्यत एवैनं रुचो दधातिगायत्री वा अनुमतिस्त्रिष्टु-ग्राका जगती सिनीवाल्यानुष्टुप् कुहूर्द्धाता वषट्कारः पूर्वपक्षो राकाऽपरपक्षः कुहूरमावास्या सिनीवाली पौर्णमास्यनुमतिश्चन्द्रमा धाताऽष्टौ - [ ] 34

**TS 3.4.9.7**

वसवोऽष्टाक्षरा गायत्र्येकादश रुद्रा एकादशाक्षरा त्रिष्टुब् द्वादशाऽऽदित्या द्वादशाक्षरा जगती प्रजा-  
पतिरनुष्टुब् धाता वषट्कार एतद्वै देविकाः सर्वाणि च छन्दांसि सर्वाश्च देवता वषट्कारस्ता यथ सह  
सर्वा निर्वपेदीश्वरा एनं प्रदहो द्वे प्रथमे निरुप्य धातुस्तृतीयं निर्वपेत् तथो एवोत्तरे निर्वपेत् तथैनं न  
प्रदहन्त्य ( ) थो यस्मै कामाय निरुप्यन्ते तमेवाऽऽभिरुपाऽऽप्नोति ॥ 35

(पशुकामश्छन्दांसि वै देविकाश्छन्दांसि-ग्रामं-कल्पयत्येता एव निरुत्तमन्धातारं करोति - मेधा  
नमत्येता एव निर्वपे - दुष्टौ - दहन्ति - नवं च) (A9)

**TS 3.4.10.1**

वास्तोष्पते प्रति जानी ह्यस्मान्ध स्वावेशो अंनमीवो भवानः । यत् त्वेमहे प्रतितन्नो जुषस्व शन्नं  
एधि द्विपदे शञ्चतुष्पदे ॥ वास्तोष्पते शग्मयां सः सदाते सक्षीमहि रण्वयां गातुमत्या । आवः  
क्षेमं उत योगे वरन्नो यूयं पात स्वस्तिभिः सदानः ॥ यथ सायं प्रातरग्निहोत्रं जुहोत्याहुतीष्टका  
एव ता उप धत्ते - [ ] 36

**TS 3.4.10.2**

यजमानोऽहोरात्राणि वा एतस्येष्टका य आहिताग्निर्यथ सायं प्रातर्जुहोत्यहोरात्राण्येवाऽऽस्वेष्टकाः  
कृत्वोप धत्ते दशं समानत्र जुहोति दशाक्षरा विराड् विराजमेवाऽऽस्वेष्टकां कृत्वोप धत्तेऽथो विरा-  
ज्येव यज्ञमाप्नोति चित्यंश्चित्योऽस्य भवति तस्माद्यत्र दशोषित्वा प्रयाति तद्-यश्वास्त्ववास्त्वेव तद्यत्  
ततोऽर्वाचीनः - [ ] 37

**TS 3.4.10.3**

रुद्रः खलु वै वास्तोष्पतिर्यदहुत्वा वास्तोष्पतीयं प्रयायाद् रुद्र एनं भूत्वाऽग्निरनूत्थाय हन्याद्वा-  
स्तोष्पतीयं जुहोति भागधेयेनैवैनं शमयति नाऽऽर्तिमाच्छति यजमानो यद्युक्ते जुहुयाद्यथा प्रयाते

वास्ता॒वाहु॑तिं जु॒होति॑ ता॒दृगे॒व तद्य॑दयु॒क्ते जुहु॑याद्यथा॒ क्षेम॑ आहु॑तिं जु॒होति॑ ता॒दृगे॒व तद॑हु॒तम॑स्य वा-  
स्तोष्प॒तीयः॑ स्या - [ ] 38

**TS 3.4.10.4**

दक्षि॑णो यु॒क्तो भव॑ति स॒व्योऽयु॒क्तोऽथ॑ वास्तोष्प॒तीयं जु॒होत्यु॒भय॑मे॒वाऽ क॑र॒परि॑वर्गमे॒वैनः॑ शमयति॒  
यदे॑क॒या जुहु॑याद॒र्विहो॑मं कु॒र्यात् पुरोऽनु॑वा॒क्यां म॒नूच्य॑ या॒ज्यया॑ जु॒होति॑ सदे॒वत्वाय॑ यद्धु॒त आ॑द॒द्ध्याद्  
रुद्रं॑ गृ॒हान॑न्वारो॒हयेद्-यद॑व॒क्षाणा॒न्यसं॑ प्र॒क्षाप्य॑ प्रया॒याद्यथा॑ य॒ज्ञेश॑सं॒वाऽऽद॑ह॒नं॒वा ता॒दृगे॒व तदु॑यन्ते  
योनि॑र्ऋ॒त्विय॑ इत्य॒रण्योः॑ स॒मारो॑हय - [ ] 39

**TS 3.4.10.5**

-त्येष॑ वा अ॒ग्रेयो॑निः स्व ए॒वैनं॑ योनौ॑ स॒मारो॑हयत्यथो॒ खल्वा॑हु॒र्यदु॑रण्योः॑ स॒मारूढो॑ नश्येदु॒दस्या॑ग्निः  
सी॑देत् पुनरा॒धेयः॑ स्या॒दिति॑ या ते अ॒ग्रे य॒ज्ञियां॑ त॒नूस्त॑ये॒ह्या रो॑हेत्या॒त्मन्थ॑ स॒मारो॑हयते॒ यज॑मानो॒ वा  
अ॒ग्रेयो॑निः स्वा॒यामे॑वैनं॑ यो॒न्याः॑ स॒मारो॑हयते ॥ 40

(ध॒त्ते-ऽर्वा॒चीनः॑ -स्याथ॑-स॒मारो॑हयति॒ -पञ्च॑चत्वारि॒ंशच्च॑) (A10)

**TS 3.4.11.1**

त्वम॑ग्रे बृ॒हद्व॑यो दधा॑सि दे॒व दा॑शुषे॑ । क॒विर्गृ॑हप॒तिर्यु॑वा॑ ॥ ह॒व्यवा॑ड॒ग्निर॒जरः॑ पि॒ता नो॑ वि॒भुर्वि॒भावां॑  
सु॒दृशी॑को अ॒स्मे । सु॒गा॒रु॒ह॒प॒त्याः॑ समि॒षो दि॑दी॒ह्यस्म॒द्रिय॑र॒क्सं मि॑मीहि॒ श्रवा॑सि ॥ त्वं च॑ सोम  
नो व॑शो जी॒वातुं॑ न म॑रामहे । प्रि॒यस्तो॑त्रो वन॒स्पतिः॑ ॥ ब्र॒ह्मा दे॒वानां॑ पद॒वीः क॑वी॒नामृ॑षिर्वि॒प्राणां॑  
महि॑षो मृ॒गाणां॑ । श्ये॒नो गृ॒द्धाणां॑ स्व॒धिति॑ र्वना॑नाः॒ सोमः॑ - [ ] 41

**TS 3.4.11.2**

प॒वित्र॑मत्ये॒ति रेभ॑न् ॥ आ वि॒श्वदे॑वः॒ सत्प॑तिः॒ सू॒क्तैर॒द्या वृ॑णीमहे । स॒त्यसं॑वः॒ सवि॑तारं॑ ॥

आस॒त्येन॒ रज॑सा॒ वर्त॑मानो निवेशय॑न्नमृतं॒ मर्त्य॑ञ्च । हिर॒ण्यये॑न सवि॒ता रथे॑नाऽऽ\* दे॒वोया॑ति॒ भुव॑ना  
विप॑श्यन् ॥ यथा॑ नो अदि॑तिः क॒रत् प॑श्चे नृ॒भ्यो यथा॑ ग॒वे । यथा॑ तो॒काय॑ रु॒द्रियं॑ ॥ मा न॑स्तो॒के  
तन॑ये मा न॒ आयु॑षि मा नो गो॒षु मा- [ ] 42

**TS 3.4.11.3**

नो अ॒श्वेषु॑ रीरिषः । वी॒रान् मानो॑ रु॒द्र भामि॑तो व॒धीर्ह॒विष्म॑न्तो नम॑सा विधेम ते ॥ उ॒दुप्रु॑तो न वयो  
रक्ष॑माणा॒ वाव॑दतो अ॒भ्रिय॑स्येव घोषाः । गिरि॑भ्रजो नोर्म॑यो म॒दन्तो बृ॒हस्प॑तिम॒भ्यर्का अ॑नावन् ॥  
ह॒सैरिव॑ सखि॑भिर्वाव॑दद्भिर॑श्मन्- मया॑नि नह॑ना व्यस्यन् । बृ॒हस्प॑तिर॒भिक॑र्नि॒क्रद॑द्वा उ॒त प्रा॑स्तौदु॒च्चं  
वि॒द्वा अ॑गायत् ॥ ए॒न्द्रं सान॑सि॒ रयि॑ - [ ] 43

**TS 3.4.11.4**

स॒जित्वा॑न॒ सदा॑सहं । वर॒षिष्ठ॑मृतये भर ॥ प्र संसा॑हिषे पुरु॒हूत॑ शत्रून् ज्येष्ठ॑स्ते शु॒ष्मं इ॒ह रा॑तिर॑स्तु  
। इन्द्राऽऽ\* भ॑र दक्षि॑णेना॒ वसू॑नि पतिः सिन्धू॑नामसि रेवती॑नां ॥ त्व॒ सु॒तस्य॑ पी॒तये॑ स॒द्यो वृ॒द्धो  
अ॑जायथाः । इन्द्र॒ ज्यैष्ठ्या॑य सु॒क्रतो ॥ भुव॑स्त्वमिन्द्र॒ ब्रह्म॑णा म॒हान् भुवो॑ विश्वेषु॒ सर्व॑नेषु य॒ज्ञियः  
। भुवो॑ नृ॒श्च्यौत्नो॑ विश्व॑स्मिन् भ॑रे ज्येष्ठ॑श्च मन्त्रो - [ ] 44

**TS 3.4.11.5**

विश्व॑च॒र॒षणे॑ ॥ मि॒त्रस्य॑ च॒र॒षणी॑धृतः श्रवो॑ दे॒वस्य॑ सान॒सिं । स॒त्यं चि॒त्र श्र॑वस्तमं ॥ मि॒त्रो  
जना॑न् यातयति प्रजा॑नन् मि॒त्रो दा॑धार पृथि॒वीमु॑त द्यां । मि॒त्रः कृ॒ष्टीर॑निमिषा॒भि च॑ष्टे स॒त्याय॑ ह॒व्यं  
घृ॒तव॑द्-विधेम ॥ प्रस॑मि॒त्र म॒तो अ॑स्तु प्रय॑स्वान्, यस्त॑ आदित्य॒ शिक्ष॑ति व्र॒तेन॑ । न ह॑न्यते न  
जी॑यते त्वोतो॒ नैन॑म॒हो अ॑श्रोत्यन्ति॑तो न दू॒रात् ॥ य- [ ] 45

**TS 3.4.11.6**

चि॒द्धि ते॑ विशो॑ यथा॒ प्रदे॑व वरुण व्र॒तं । मि॒नीम॑सि द्यवि॑द्यवि ॥ यत् किञ्चे॒द्वरु॑ण॒ दैव्ये॑ जने॑ऽभिद्रोहं

मनुष्याँश्चराँमसि । अचिँत्तीयत् तव धर्मा युयोपिममा नुस्तस्मा देनसो देव रीरिषः ॥ कितुवासो  
यद्रिँ रिपुर्न दीवि यद्वाँ घा सृत्य मुतयन्न विन्न । सर्वाँ ता विष्यँ शिथिरे ( ) वँ देवाथाँ ते स्याम  
वरुण प्रियासः ॥ 46

(सोमो-गोषु मा- रयिँ - मन्त्रो -य-च्छिँथिरा-सप्त चँ ) (A11)

**praSna korvai with starting padams of 1 to 11 anuvAkams :-**

(वि वा एतस्या - ऽऽवाँयो - इमे वै - चित्तञ्चा - ऽग्निर्भूतानाँ - देवा वा अभ्याताना - नृताषाड् -  
राष्ट्रकाँमाय - देविँका - वास्तोष्पते - त्वमँग्रे बृह - देकाँदश )

**korvai with starting padams of 1, 11, 21 series of pa jcAtis :-**

(वि वा एतस्ये - त्याँह - मृत्युर्गन्धर्वो - ऽवँ रुन्धे मद्भ्यत - स्त्वमँग्रे बृहथ् - षट्त्वारिँशत्)

**first and last padam of Fourth praSnam of kANDam 3 :-**

(वि वा एतस्यँ - प्रियासः )

॥ हरिँः ॐ ॥ ॥ कृष्ण यजुर्वेदीय तैत्तिरीय संहितायां तृतीयकाण्डे चतुर्थः प्रश्नः समाप्तः ॥

### 3.5 तृतीयकाण्डे पञ्चमः प्रश्नः - इष्टिशेषाभिधानं

#### TS 3.5.1.1

पूर्णा पश्चादुत पूर्णा पुरस्तादुन्-मद्ध्यतः पौर्णमासी जिगाय । तस्यान् देवा अधि सँवसन्त उत्तमे  
नाकं इह मादयन्तां ॥ यत्ते देवा अदधु भागधेयममावास्ये सँवसन्तो महित्वा । सानो यज्ञं पिपृहि  
विश्ववारे रयिं नो धेहि सुभगे सुवीरं ॥ निवेशनी सङ्गमनी वसूनां विश्वा रूपाणि वसून्त्यावेशयन्ती ।  
सहस्रपोषः सुभगा रराणा सा न आगन् वर्यसा - [ ] 1

#### TS 3.5.1.2

सँविदाना ॥ अग्नीषोमौ प्रथमौ वीर्येण वसून् रुद्रानादित्यानिह जिन्वतं । माद्ध्यः हि पौर्णमासं  
जुषेथां ब्रह्मणा वृद्धौ संकृतेन सातावथाऽस्मभ्यः सहवीराः रयिं नि यच्छतं ॥ आदित्याश्चाऽङ्गि-  
रसश्चाग्नीनाऽदधत् ते दंशपूर्णमासौ प्रैफसन् तेषामङ्गिरसां निरुप्तः हविरासीदथाऽऽदित्या एतौ  
होमावपश्यन् तावजुहवुस्ततो वै ते दंशपूर्णमासौ - [ ] 2

#### TS 3.5.1.3

पूर्व आ ऽलभन्त दंशपूर्णमासा-वालभमान एतौ होमौ पुरस्ताज्जुहुयाथ साक्षादेव दंशपूर्णमासावा  
लभते ब्रह्मवादिनो वदन्ति स त्वै दंशपूर्णमासावा लभेत य एनयोरनु-लोमञ्च प्रतिलोमञ्च विद्या-  
दित्यमावास्याया ऊर्द्धं तदनुलोमं पौर्णमास्यै प्रतीचीनं तत् प्रतिलोमं यत् पौर्णमासीं पूर्वामालभेत  
प्रतिलोममेनावा लभेता-मुमपक्षीयमाण-मन्वप - [ ] 3

#### TS 3.5.1.4

क्षीयेत सारस्वतौ होमौ पुरस्ताज्जुहुयादमावास्या वै सरस्वत्यनुलोम-मेवैनावा लभते ऽमुमाप्यायमा-  
नमन्वा प्यायत आग्नावैष्णव-मेकादशकपालं पुरस्तान्निर्वपेथ सरस्वत्यै चरुः सरस्वते द्वादशकपालं  
यदाग्नेयो भवत्यग्निर्वै यंस्मुखं यंस्मुखमेवर्द्धि पुरस्ताद्-धत्ते यद्वैष्णवो भवति यज्ञो वै विष्णुर्यंस्मे-

वाऽऽ\*रभ्य प्रतनुते सरस्वत्यै ( ) चरुर्भवति सरस्वते द्वादशकपालोऽमावास्यां वै सरस्वती पूर्णमासः  
सरस्वान् तावेव साक्षादा रभत ऋद्धोत्याभ्यां द्वादशकपालः सरस्वते भवति मिथुनत्वाय प्रजात्यै  
मिथुनौ गावौ दक्षिणा समृद्धयै ॥ 4

(वर्चसा - वै ते दशपूर्णमासा - वप - तनुते सरस्वत्यै - पञ्चविंशतिश्च) (A1)

### TS 3.5.2.1

ऋषयो वा इन्द्रं प्रत्यक्षं नापश्यन् तं वसिष्ठः प्रत्यक्षमपश्यथ सौऽब्रवीद्-ब्राह्मणं ते वक्ष्यामि यथा त्व-  
त्पुरोहिताः प्रजाः प्रजनिष्यन्तेऽथ मेतरेभ्य ऋषिभ्यो मा प्रवोच इति तस्मा एतान्थस्तोम-भागानब्रवीत्  
ततो वसिष्ठपुरोहिताः प्रजाः प्राजायन्त तस्माद्-वासिष्ठो ब्रह्मा कार्यः प्रैव जायते रश्मिरसि क्षयाय  
त्वा क्षयं जिन्वे - [ ] 5

### TS 3.5.2.2

-त्याह देवा वै क्षयो देवेभ्य एव यज्ञं प्राऽऽ\*ह प्रेतिरसि धर्माय त्वा धर्मं जिन्वेत्याह मनुष्या  
वै धर्मो मनुष्येभ्य एव यज्ञं प्राऽऽ\*हान्वितिरसि दिवे त्वा दिवं जिन्वेत्याहैभ्य एव लोकेभ्यो यज्ञं  
प्राऽऽ\*हविष्टम्भोऽसि वृष्ट्यै त्वा वृष्टिं जिन्वेत्याह वृष्टिमेवाव - [ ] 6

### TS 3.5.2.3

रुन्धे प्रवाऽस्यनुवाऽसीत्याह मिथुनत्वायोशिगंसि वसुभ्यस्त्वा वसूञ्जिन्वेत्याहृष्टौ वसव एकादश रुद्रा  
द्वादशाऽऽ\*दित्या एतावन्तो वै देवास्तेभ्य एव यज्ञं प्राऽऽ\*हौजोऽसि पितृभ्यस्त्वा पितृन् जिन्वेत्याह  
देवानेव पितृननु सन्तनोति तन्तुरसि प्रजाभ्यस्त्वा प्रजा जिन्वे - [ ] 7

### TS 3.5.2.4

-त्याह पितृनेव प्रजा अनु सन्तनोति पृतनाषाडंसि पशुभ्यस्त्वा पशूञ्जिन्वेत्याह प्रजा एव पशूननु



सन्तनोतिरेवदस्यो-षधीभ्यु स्त्वौषधी-जिन्वेत्याहौषधीष्वेव पशून् प्रतिष्ठापयत्यभिजिदसि युक्तग्रावेन्द्राय  
त्वेन्द्रं जिन्वेत्याहभिजित्या अधिपतिरसि प्राणाय त्वा प्राणं - [ ] 8

**TS 3.5.2.5**

जिन्वेत्याह प्रजास्वेव प्राणान् दधाति त्रिवृदसि प्रवृदसीत्याह मिथुनत्वाय सश्रोहोऽसि नीरोहोऽसी-  
त्याह प्रजात्यै वसुकोऽसि वेषश्रिरसि वस्यष्टिरसीत्याह प्रतिष्ठित्यै ॥ 9

(जिन्वेत्य - वं - प्रजा जिन्व - प्राणन् - त्रिःशच्च) (A2)

**TS 3.5.3.1**

अग्निना देवेन पृतना जयामि गायत्रेण छन्दसा त्रिवृता स्तोमेन रथन्तरेण साम्ना वषट्कारेण वज्रेण  
पूर्वजान् भ्रातृव्यानधरान् पादयाम्यवैनान् बाधे प्रत्येनान्नुदेऽस्मिन् क्षयेऽस्मिन् भूमिलोके योऽस्मान्  
द्वेष्टि यच्च वयं द्विष्मो विष्णोः क्रमेणाऽत्येनान् क्रामामीन्द्रेण देवेन पृतना जयामि त्रैष्टुभेन छन्दसा  
पञ्चदशेन स्तोमेन बृहता साम्ना वषट्कारेण वज्रेण - [ ] 10

**TS 3.5.3.2**

सहजान् विश्वेभिर्देवेभिः पृतना जयामि जागतेन छन्दसा सप्तदशेन स्तोमेन वामदेव्येन साम्ना वष-  
ट्कारेण वज्रेणा परजानिन्द्रेण सयुजो वयः सांसह्याम पृतन्यतः । घन्तो वृत्राण्यप्रति । यत्ते अग्ने  
तेजस्तेनाहं तेजस्वी भूयासं यत्ते अग्ने वर्चस्तेनाहं वर्चस्वी भूयासं यत्ते अग्ने हरस्तेनाहं हरस्वी  
भूयासं ॥ 11

(बृहता साम्ना वषट्कारेण वज्रेण - षट्त्वारिंशच्च) (A3)

**TS 3.5.4.1**

ये देवा यज्ञह्नो यज्ञमुषः पृथिव्यामद्भ्यासन्ते । अग्निर्मा तेभ्यो रक्षतु गच्छेम सुकृतो वयं ॥ आऽग-  
न्म मित्रावरुणा वरेण्या रात्रीणां भागो युवयोर्यो अस्ति । नाकं गृह्णानाः सुकृतस्य लोके तृतीये पृष्ठे  
अधि रोचने दिवः ॥ ये देवा यज्ञह्नो यज्ञमुषोऽन्तरिक्षेऽद्भ्यासन्ते । वायुर्मा तेभ्यो रक्षतु गच्छेम  
सुकृतो वयं ॥ यास्ते रात्रीः सवित - [ ] 12

**TS 3.5.4.2**

-देवयानीरन्तरा द्यावापृथिवी वियन्ति । गृहैश्च सर्वैः प्रजया न्वग्रे सुवो रुहाणास्तरता राजांसि ॥  
ये देवा यज्ञह्नो यज्ञमुषो दिव्यद्भ्यासन्ते । सूर्यो मा तेभ्यो रक्षतु गच्छेम सुकृतो वयं ॥ येनेन्द्राय  
समभरः पयांस्युत्तमेन हविषा जातवेदः । तेनाऽग्रे त्वमुत वर्द्धयेमः संजातानाः श्रेष्ठ्य आ धेह्येनं  
॥ यज्ञह्नो वै देवा यज्ञमुषः - [ ] 13

**TS 3.5.4.3**

सन्ति त एषु लोकेष्वासत आददाना विमश्राना यो ददाति यो यजते तस्य । ये देवा यज्ञह्नः पृथि-  
व्यामद्भ्यासन्ते ये अन्तरिक्षे ये दिवीत्याहेमानेव लोकास्तीर्त्वा सगृहः सपशुः सुवर्गं लोकमेत्यप वै  
सोमेनेजानाद्देवतांश्च यज्ञश्च क्रामन्त्याग्रेयं पञ्चकपालमुदवसानीयं निर्वपेदग्निः सर्वा देवताः - [ ] 14

**TS 3.5.4.4**

पाङ्क्तो यज्ञो देवतांश्चैव यज्ञञ्चाव रुन्धेगायत्रो वा अग्निर्गायत्र छन्दास्तं छन्दसा व्यर्द्धयति यत् पञ्चक-  
पालं करोत्यष्टाकपालः कार्योऽष्टाक्षरा गायत्री गायत्रोऽग्निर्गायत्र छन्दाः स्वेनैवैनं छन्दसा समर्द्धयति  
पङ्क्त्यौ याज्यानुवाक्ये भवतः पाङ्क्तो यज्ञस्तेनैव यज्ञात्रैति ॥ 15

(सवित-देवा यज्ञमुषः - सर्वा देवता - स्त्रिचत्वारिंशच्च) (A4)

**TS 3.5.5.1**

सूर्यो॑ मा दे॒वो दे॒वेभ्यः॑ पातु वा॒युरन्तरिक्षा॑द्-यज॑मानोऽग्नि॒र्मा पातु॑ चक्षुषः । सक्षु॑ शूष॒ सवित॑र्विश्व-  
चर॒ षण ए॒तेभिः॑ सोम॒ नामभिर्वि॑धेम ते तेभिः॑ सोम॒ नामभिर्वि॑धेम ते ॥ अ॒हं प॒रस्ता॑द्-हम॒वस्ता॑द्-हं  
ज्योति॑षा वि तमो॑ ववार । यदन्तरि॑क्षं तदु॑ मे पि॒ताऽभू॑द्दह॒ः सूर्य॑मुभयतो॑ ददर॒ शाहं॑ भूया॒ समुत्त॑मः  
समा॒नाना॑ - [ ] 16

**TS 3.5.5.2**

मा संमु॒द्रा-दाऽन्तरि॑क्षात्-प्र॒जाप॑तिरुदुधिं च्या॑वया॒तीन्द्रः॑ प्रस्त्रौतु म॒रुतो॑ वर॒ षय॑न्तून्म॒भय॑ पृथि॒वीं भि-  
न्धी॑दं दि॒व्यं नभः॑ । उ॒द्रो दि॒व्यस्य॑ नो दे॒हीशा॑नो वि॒सृजा॑ दतिं ॥ प॒शवो॑ वा ए॒ते यदा॑दित्य ए॒ष  
रु॒द्रो यद॑ग्निरोष॑धीः प्रा॒स्याग्ना॑वा॒दित्यं जु॑होति रु॒द्रादे॒व प॒शून्त॑र्दधा॒त्यथो॑ ओष॑धीष्वे॒व प॒शून् - [ ] 17

**TS 3.5.5.3**

प्रति॑ष्ठापयति क॒विर्य॑ज्ञस्य॒ वित॑नोति॒ पन्थां॑ नाक॑स्य पृ॒ष्ठे अधि॑ रोच॒ने दि॒वः । येन॑ ह॒व्यं व॑हसि॒ यासि॑  
दूत॒ इतः॑ प्रचे॒ता अ॒मुतः॑ सनी॑यान् ॥ यास्ते॒ विश्वाः॑ स॒मिधः॑ सन्त्य॑ग्रेयाः पृथि॒व्यां ब॒रुहि॑षि सूर्ये  
याः । तास्ते॑ गच्छ॒न्त्वाहु॑तिं घृ॒तस्य॑ दे॒वाय॑ते यज॑मानाय॒ शर्म॑ ॥ आ॒शासा॑नः सु॒वीर्य॑ः रा॒यस्पोष॑ः  
स्वश्चि॑यं । बृ॒हस्प॑ति॒ना रा॒या स्व॒गाकृ॑तो॒ मह्यं॑ यज॑मानाय ( ) तिष्ठ ॥ 18

(समा॒नाना॑-मोष॑धीष्वे॒व प॒शून् - मह्यं॑ यज॑माना॒ - यैक॑ञ्च) (A5)

**TS 3.5.6.1**

सं त्वा॑ नह्यामि॒ पर्य॑सा घृ॒तेन॑ सं त्वा॑ नह्याम्य॒प ओष॑धीभिः । सं त्वा॑ नह्यामि॒ प्रज॑याऽहम॒द्य सा  
दी॑क्षिता संनवो॑ वाज॑म॒स्मे ॥ प्रै॒तु ब्र॒ह्मण॑स्प॒त्नी वेदि॑र्वर्णे॒न सी॑दतु । अथा॒हम॑नुका॒मिनी॑ स्वे लो॒के  
वि॒शा इ॒ह ॥ सु॒प्रज॑स॒स्त्वा व॒यः सु॒पत्नी॑रुपं सेदिम । अग्रे॑ सप॒त्नद॑म्भ॒नम॑द॒ब्धासो॑ अदा॒भ्यं ॥  
इमं॑ वि॒ष्यामि॒ वरु॑णस्य॒ पाशं॑ - [ ] 19

**TS 3.5.6.2**

यमबद्धीत सविता सुकेतः । धातुश्च योनौ सुकृतस्य लोके स्योनं मे सह पत्यां करोमि ॥प्रेह्युदेह्यु-  
तस्य वामीरन्वग्निस्तेऽग्रं नयत्वदितिर्मद्ध्यं ददताः रुद्रावसृष्टाऽसि युवा नाम मा मां हिःसीर्वसुभ्यो  
रुद्रेभ्य आदित्येभ्यो विश्वेभ्यो वो देवेभ्यः पन्नेजनीर्गृह्णामि यज्ञाय वः पन्नेजनीः सादयामि विश्वस्य  
ते विश्वावतो वृष्ण्यावत - [ ] 20

**TS 3.5.6.3**

स्तवाग्ने वामीरनु सृष्टं विश्वा रेतांसि धिषीयाऽगन् देवान्. यज्ञो नि देवीर्देवेभ्यो यज्ञमशिषन्नस्मिन्  
सुन्वति यजमान आशिषः स्वाहाकृताः समुद्रेष्टा गन्धर्वमातिष्ठतानु । वातस्य पत्मन्निड ईडिताः  
॥ 21

(पाशं - वृष्ण्यावत - स्त्रिःशच्च) (A6)

**TS 3.5.7.1**

वृषद्वारो वै गायत्रियै शिरोऽछिनत् तस्यै रसः पराऽपतथ स पृथिवीं प्राविशत्स खंदिरोऽभवद्यस्य  
खादिरः सुवो भवति छन्दसामेव रसेनाव द्यति सरसा अस्याऽऽहुतयो भवन्ति तृतीयस्यामितो  
दिवि सोम आसीत् तं गायत्र्याऽ हरत् तस्य पूर्णमच्छिद्यत् तत् पूर्णोऽभवत् तत् पूर्णस्य पूर्णत्वं  
यस्य पूर्णमयी जुहू - [ ] 22

**TS 3.5.7.2**

-भवति सौम्या अस्याऽऽहुतयो भवन्ति जुषन्तोऽस्य देवा आहुतीर्देवा वै ब्रह्मन्नवदन्त तत् पूर्ण  
उपाऽशृणोथ सुश्रवा वै नाम यस्य पूर्णमयी जुहूर्भवति न पापः श्लोकः शृणोति ब्रह्म वै पूर्णो  
विण्मरुतोऽन्नं विण्मारुतोऽश्वत्थो यस्य पूर्णमयी जुहूर्भवत्याश्वत्थ्युपभृद्- ब्रह्मणैवान्नमव रुन्धेऽथो  
ब्रह्मै - [ ] 23

**TS 3.5.7.3**

-व विश्वद्व्यूहति राष्ट्रं वै पुणो विडंश्चत्थो यत् पर्णमयी जुहूर्भवत्या-श्चत्थ्युपभृद्-राष्ट्रमेव विश्वद्व्यूहति प्रजापतिर्वा अंजुहोथ सा यत्राऽऽहुतिः प्रत्यतिष्ठत् ततो विकङ्कत् उदतिष्ठत् ततः प्रजा असृजत् यस्य वैकङ्कती ध्रुवा भवन्ति प्रत्यवास्या ऽऽहुतयस्तिष्ठन्त्यथो प्रैव जायत एतद्वै सुचाः ( ) रूपं य-स्यैवः रूपाः सुचो भवन्ति सर्वाण्येवैनः रूपाणि पशूनामुपतिष्ठन्ते नास्याप-रूपमात्मजायते ॥ 24

(जुहू - रथो ब्रह्म - सुचाः - सप्तदश च) (A7)

**TS 3.5.8.1**

उपयामगृहीतोऽसि प्रजापतये त्वा ज्योतिष्मते ज्योतिष्मन्तं गृह्णामि दक्षाय दक्षवृधे रातं देवेभ्योऽग्नि जिह्वेभ्यस्त्वर्तायुभ्य इन्द्रज्येष्ठेभ्यो वरुणराजभ्यो वातापिभ्यः पर्जन्यात्मभ्यो दिवे त्वाऽन्तरिक्षाय त्वा पृथिव्यै त्वाऽपेन्द्र द्विषतो मनोऽप जिज्यासतो जुह्वप यो नोऽरातीयति तं जहि प्राणाय त्वाऽपानाय त्वा व्यानाय त्वा सते त्वाऽसते त्वाऽद्भ्यस्त्वौषधीभ्यो ( ) विश्वेभ्यस्त्वा भूतेभ्यो यतः प्रजा अ-क्विद्रा अजायन्त तस्मै त्वा प्रजापतये विभूदावन्ने ज्योतिष्मते ज्योतिष्मन्तं जुहोमि ॥ 25

(ओषधीभ्य - श्वतुर्दश च) (A8)

**TS 3.5.9.1**

यां वा अद्भ्युश्च यजमानश्च देवतामन्तरितस्तस्या आ वृश्च्येते प्राजापत्यं दधिग्रहं गृहीयात् प्रजाप-तिः सर्वा देवता देवताभ्य एव निहुवाते ज्येष्ठो वा एष ग्रहाणां यस्यैष गृह्यते ज्येष्ठ्यमेव गच्छति सर्वासां वा एतद्देवतानां रूपं यदेष ग्रहो यस्यैष गृह्यते सर्वाण्येवैनः रूपाणि पशूनामुपतिष्ठन्त उपयामगृहीतो - [ ] 26

**TS 3.5.9.2**

-ऽसि प्रजापतये त्वा ज्योतिष्मते ज्योतिष्मन्तं गृह्णामीत्याह ज्योतिरेवैनं समा॑नानां करोत्यग्नि-  
जिह्वेभ्यस्त्वर्तायुभ्य इत्याहैतावतीर्वै देवतास्ताभ्य एवैनं सर्वाभ्यो गृह्णत्यपेन्द्र द्विषतो मन इत्याह  
भ्रातृव्यापनुत्त्यै प्राणाय त्वाऽपानाय त्वेत्याह प्राणानेव यजमाने दधाति तस्मै त्वा प्रजापतये विभू-  
दावन्ने ज्योतिष्मते ज्योतिष्मन्तं जुहोमी - [ ] 27

**TS 3.5.9.3**

-त्याह प्रजापतिः सर्वा देवताः सर्वाभ्य एवैनं देवताभ्यो जुहोत्याज्यग्रहं गृह्णीयात् तेजस्कामस्य  
तेजो वा आज्यं तेजस्येव भवति सोमग्रहं गृह्णीयाद् ब्रह्मवर्चसकामस्य ब्रह्मवर्चसं वै सोमो ब्रह्मवर्च-  
स्येव भवति दधिग्रहं गृह्णीयात् पशुकामस्योगवै दध्यूर्कं पशवं ऊर्जैवास्मा ऊर्जं पशूनं रुन्धे ॥ 28

(उपयामगृहीतो - जुहोमि - त्रिचत्वारिंशच्च) (A9)

**TS 3.5.10.1**

त्वे ऋतुमपि वृञ्जन्ति विश्वे द्विर्यदेते त्रि-र्भवन्त्यूमाः । स्वादोः स्वादीयः स्वादुनां सृजा समतं ऊ षु  
मधु मधुनाऽभि योधि । उपयामगृहीतोऽसि प्रजापतये त्वा जुष्टं गृह्णाम्येष ते योनिः प्रजापतये त्वा  
॥ प्राणग्रहान् गृह्णत्येतावद्वा अस्ति यावदेते ग्रहाः स्तोमाश्छन्दांसि पृष्ठानि दिशो यावदेवास्ति त  
- [ ] 29

**TS 3.5.10.2**

-दवं रुन्धे ज्येष्ठा वा एतान् ब्राह्मणाः पुरा विदामक्रन् तस्मात् तेषां सर्वा दिशोऽभिर्जिता अभूवन्.  
यस्यै ते गृह्यन्ते ज्यैष्ठ्यमेव गच्छत्यभि दिशो जयति पञ्च गृह्यन्ते पञ्च दिशः सर्वास्वेव दिक्ष-  
वृद्धवन्ति नवनव गृह्यन्ते नव वै पुरुषे प्राणाः प्राणानेव यजमानेषु दधति प्रायणीये चोदयनीये च  
गृह्यन्ते प्राणा वै प्राणग्रहाः - [ ] 30

**TS 3.5.10.3**

प्राणैरेव प्रयन्ति प्राणैरुद्यन्ति दशमेऽहन् गृह्यन्ते प्राणा वै प्राणग्रहाः प्राणेभ्यः खलु वा एतत् प्रजा यन्ति यद्वामदेव्यं योनेश्च्यवते दशमेऽहन् वामदेव्यं योनेश्च्यवते यद्दशमेऽहन् गृह्यन्ते प्राणेभ्य एव तत् प्रजा नयन्ति ॥ 31

(तत् - प्राणग्रहाः - सुप्तविशच्च) (A10)

**TS 3.5.11.1**

प्र देवन्देव्या धिया भरता जातवेदसं । हव्या नो वक्षदानुषक् ॥ अयमुष्य प्रदेव्युरहोता यज्ञाय नीयते । रथो न योरभीवृतो घृणीवान् चेतति त्मना ॥ अयमग्निरुष्यत्यमृतादिव जन्मनः । सहसश्चिथ् सहीयान् देवो जीवातवे कृतः ॥ इडायास्त्वा पदे वयं नाभां पृथिव्या अधि । जातवेदो नि धीमह्यग्ने हव्याय वोढवे ॥ 32

**TS 3.5.11.2**

अग्ने विश्वेभिः स्वनीक देवैरूणावन्तं प्रथमः सीदु योनिं । कुलायिनं घृतवन्तः सवित्रे यज्ञं नय यजमानाय साधु ॥ सीदं होतुः स्व उं लोके चिकित्वान्त्सादया यज्ञं संकृतस्य योनौ । देवा-वीदेवान् हविषा यजास्यग्ने बृहद्-यजमाने वयो धाः ॥ नि होता होतृषदने विदानस्त्वेषो दीदृवाः असदथ सुदक्षः । अदब्धव्रत-प्रमतिर्वसिष्ठः सहस्रं भुरः शुचिजिह्वो अग्निः ॥ त्वं दूतस्त्व - [ ] 33

**TS 3.5.11.3**

मुं नः परस्पास्त्वं वस्य आ वृषभ प्रणेता । अग्ने तोकस्य नस्तने तनूनामप्रयुच्छन् दीद्यद्वोधि गोपाः ॥ अभि त्वा देव सवितरीशानं वार्याणां । सदाऽवन् भागमीमहे ॥ मही द्यौः पृथिवी च न इमं यज्ञं मिमिक्षतां । पिपृतां नो भरीमभिः ॥ त्वामग्ने पुष्करादद्ध्यथर्वा निरमन्थत । मूर्द्धो विश्वस्य

वा॒घतः॑ ॥ तमु॑ - [ ] 34

#### TS 3.5.11.4

त्वा दु॒द्ध्यङ्घ्रि॑भिः पु॒त्र ई॒धे अथ॑र्वणः । वृ॒त्रह॑णं पु॒रन्द॑रं ॥ तमु॑ त्वा पा॒थ्यो वृ॒षा समी॑धे दस्यु॒हन्त॑मं  
। ध॒नं ज॒यः रणे॑रणे ॥ उ॒त ब्रु॑वन्तु ज॒न्तव॑ उदु॒ग्निर्वृ॑त्रहाऽज॒नि । ध॒नं ज॒यो रणे॑रणे ॥ आ यः  
हस्ते॑ न खा॒दिनः॑ शिशु॑ जा॒तं न बिभ्र॑ति । वि॒शाम॒ग्निः स्व॑द्ध॒रं ॥ प्रदे॑वं दे॒ववी॑तये भ॒रता॑ वसु॒वित्त॑मं  
। आस्वे॑ योनौ॒ नि षी॑दतु ॥ आ - [ ] 35

#### TS 3.5.11.5

जा॒तं जा॒तवे॑दसि प्रि॒यः शि॑शी॒ताऽति॑थिं । स्यो॒न आ गृ॑हप॒तिं ॥ अ॒ग्निना॒ग्निः समि॑द्ध्यते क॒विर्गृ॑हप॒-  
ति॒र्युवा॑ । ह॒व्यवा॑ड् जु॒ह्वीस्यः॑ ॥ त्वः ह्य॑ग्ने अ॒ग्निना॒ विप्रो॑ विप्रेण॒ सन्ध॑स॒ता । सखा॒ सख्या॑ समि॒द्ध्यसे॑  
॥ तं म॑र्जयन्त सु॒क्रतु॑ पुरो॒यावा॑नमा॒जिषु॑ । स्वेषु॑ क्षयेषु॒ वाजि॑नं ॥ य॒ज्ञेन॑ य॒ज्ञम॑यजन्त दे॒वास्ता॑-  
नि॒ धर्मा॑णि प्रथ॒मान्या॑सन् । ते ह॒ नाकं॑ महि॒मानः॑ सचन्ते॒ यत्र ( ) पूर्वे॑ सा॒द्भ्याः सन्ति॑ दे॒वाः ॥ 36

(वोढे॑वे- दू॒तस्त्वं - तमु॑ - सीदु॒त्वा - यत्र॑ - च॒त्वारि॑ च) (A11)

**praSna korvai with starting padams of 1 to 11 anuvAkams :-**

(पूर्णा - र॒षयो॑ - ऽग्नि॒ना - ये दे॒वाः - सूर्यो॑ मा - सन्त्वा॑ नह्यामि - वष॑ट्कारः स ख॑दिर -  
उ॒पया॑मर्ग॒हीतो॑ऽसि - यां वै - त्वे क्र॒तुं - प्रदे॒व - मेका॑दश )

**korvai with starting padams of 1, 11, 21 series of pa jCAtis :-**

(पूर्णा - सं॒हजान् - तवा॑ऽग्ने - प्रा॒णैरे॒व - षट्त्रि॑ंशत्)

**first and last padam of Fifth praSnam of kANDam 3:-**



(पूर्णा - सन्ति देवाः)

॥ हरिः ॐ ॥ ॥ कृष्ण यजुर्वेदीय तैत्तिरीय संहितायां तृतीयकाण्डे पञ्चमः प्रश्नः समाप्तः ॥

॥ इति तृतीयं काण्डं ॥